



05746

通志卷第一百二十八

宋 右 迪 功

鄭 鄴

書 樵 策

漁 仲

撰

列傳第四十一

晉

王舒 子允 王廙 弟彬 彬 從弟 虞潭 孫嘯父 顧

衆 張闓 陸曄 弟玩 何充 褚粲 蔡謨

諸葛恢 殷浩 顧悅之 孔愉 子汪 安國 弟祇

弟羣 羣 子沈 丁潭 張茂 陶回 謝尚 謝安 子混 安兒

奕弟 奕 子元 安弟 万 万弟 石 石兄 子明

王舒字處明丞相導之從弟也父會侍御史舒少為從

通志

卷一百二十八

列傳四十一

一

兄敦所知以天下多故不營當時名恆處私門潛心學

植年四十餘州禮命太傅辟皆不就及敦為青州舒往

依焉時敦被徵為祕書監以寇難路險輕騎歸洛陽委

棄公主時輜重金寶甚多親賓無不競取惟舒一無所

眄益為敦所賞及元帝鎮建康因與諸父兄弟俱渡江

委質焉參鎮東軍事出補溧陽令明帝之為東中郎將

妙選上佐以舒為司馬轉後將軍宣城公褚裒諮議參

軍遷軍司固辭不受裒鎮廣陵復以舒為車騎司馬頻

領望府咸稱明練裒薨遂代裒鎮除北中郎將監青徐

二州軍事頃之徵國子博士加散騎常侍未拜轉少府

太寧初徙廷尉敦表舒爲鷹揚將軍荊州刺史領護南蠻校尉監荊州沔南諸軍事及敦敗王含父子俱奔舒舒遣軍逆之竝沈於江進都督荊州平西將軍假節尋以陶侃代舒轉舒爲安南將軍廣州刺史舒疾病不樂越嶺朝議亦以其有功不應遠出乃徙爲湘州刺史將軍都督持節如故徵代鄧攸爲尙書僕射時將徵蘇峻司徒王導欲出舒爲外援乃授撫軍將軍會稽內史秩中二千石舒上疏辭以父名會朝議以字同音異於禮無嫌舒復陳音雖異而字同求換他郡於是改會字爲鄧舒不得已而行在郡二年而蘇峻作逆乃假舒節都

通志

卷四十一

列傳四十一

二

督行揚州刺史事時吳國內史庾水棄郡奔舒舒移告屬郡以吳王師虞駿爲軍司御史中丞謝藻行龍驤將軍監前鋒征討軍事率衆一萬與庾水俱渡浙江前義興太守顧衆護軍參軍顧颺等皆起義軍以應舒舒假衆揚威將軍督護吳中軍事颺監晉陵軍事於御亭築壘峻聞舒等兵起乃赦庾亮諸弟以悅東軍舒率衆次郡之西江爲水藻後繼水颺等遣前鋒進據無錫遇賊將張健等數千人交戰大敗奔還御亭復自相驚擾水颺等竝敗於錢唐藻守嘉興賊遂入吳燒府舍掠諸縣所在塗地舒以輕進奔敗斬二軍主者免水颺督護以

白衣行事更以顧衆督護吳晉陵軍屯兵章埭吳興太守虞潭率所領討健屯烏苞亭竝不敢進時暴雨大水賊管商乘船旁出襲潭及衆潭等奔敗潭還保吳興衆退守錢唐舒更遣將軍陳孺率精銳千人增戍海浦所在築壘或勸舒宜還都使謝藻守西陵挾海立柵舒不聽留藻錢唐使衆颺守紫壁於是賊轉攻吳興潭諸軍復退賊復掠東遷餘杭武康諸縣舒遣子允之行揚烈將軍與將軍徐遜陳孺及揚烈司馬朱燾以精銳三千輕邀賊於武康出其不意遂破之斬首數百級賊悉委舟步走允之收其器械進兵助潭時賊韓晃旣破宣城

通志

卷一百一

列傳四十一

三

轉入故鄣長城允之遣朱燾何準等擊之戰於于湖潭以彊弩射之晃等退走斬首千餘級納降二千人潭由是得保郡是時臨海新安諸山縣竝反應賊舒分兵悉討平之會陶侃等至京都舒潭等竝以屢戰失利移書盟府自貶去節侃遣使敦喻不聽及侃立行臺上舒監浙江東五郡軍事允之督護吳郡義興晉陵三郡征討軍事旣而晃等南走允之追躡於長塘湖復大破之賊平以功封彭澤縣侯尋卒官贈車騎大將軍儀同三司諡曰穆長子晏之蘇峻時爲護軍參軍被害晏之子崑之嗣卒子陋之嗣宋受禪國除晏之弟允之最知名允

之字深猷總角從伯敦謂爲似已恆以自隨出則同輿入則共寢敦嘗夜飲允之辭醉先臥敦與錢鳳謀爲逆允之已醒悉聞其言慮敦或疑已便於臥處大吐衣面竝汗鳳旣出敦果照視見允之臥吐中以爲大醉不復疑之時父舒始拜廷尉允之求還定省敦許之至都以敦鳳之謀議事白舒舒卽與導俱啓明帝舒爲荊州允之隨在西府及敦平帝欲令允之仕舒請曰臣子尙少不樂早官帝許隨舒之會稽及蘇峻反允之討賊有功封番禺縣侯邑千六百戶除建武將軍錢唐令領司鹽都尉舒卒去職旣葬除義興太守以憂哀不拜從伯導

通志

卷一百一

列傳四十一

四

與其書曰太保安豐侯以孝聞天下不得辭司隸和長輿海內名士不免作中書令吾羣從死亡略盡子弟零落遇汝如親如其不爾吾復何言允之固不肯就咸和末除宣城內史監揚州江西四郡事建武將軍鎮于湖咸康中進號西中郎將假節尋遷南中郎將江州刺史莅政甚有威惠時王恬服闋除豫章郡允之聞之驚愕以爲恬丞相子應被優遇不可出爲遠郡乃求自解州欲與庾冰言之冰聞甚媿卽以恬爲吳郡而以允之爲衛將軍會稽內史未到卒年四十諡曰忠子晞之嗣卒

子肇之嗣

王廙字世將丞相導從弟而元帝姨弟也父正尚書郎廙少能屬文多所通涉工書畫善音樂射御博奕雜技辟太傅掾轉參軍豫迎大駕封武陵縣侯拜尚書郎出爲濮陽太守元帝作鎮江左廙棄郡過江帝見之大悅以爲司馬頻守廬江鄱陽二郡豫討周馥杜弼以功累增封邑除冠軍將軍鎮石頭領丞相軍諮祭酒王敦啓爲寧遠將軍荊州刺史及帝卽位廙奏中興賦上疏稱述功德文多不載初王敦左遷陶侃使廙代爲荊州將吏馬俊鄭攀等上書請畱侃敦不許廙爲俊等所襲奔

於江安賊杜曾與俊攀北迎第五猗以距廙廙督諸軍

通志

卷一百一十五

列傳四十一

五

討曾又爲曾所敗敦命湘州刺史甘卓豫章太守周廣等助廙擊曾衆潰廙得到州廙性雋率嘗從南下且自尋陽迅風飛帆暮至都倚舫樓長嘯神氣甚逸王導謂庾亮曰世將爲傷時識事亮曰正足舒其逸氣耳廙在州大誅戮侃時將佐及徵士皇甫方回於是大失荆土之望人情乖阻帝乃徵廙爲輔國將軍加散騎常侍以母喪去職服闋拜征虜將軍進左衛將軍及王敦構禍帝遣廙喻敦旣不能諫其悖逆乃爲敦所畱受任助亂敦得志以廙爲平南將軍領護南蠻校尉荊州刺史尋病卒帝猶以親故深痛愍之喪還京都皇太子親臨拜

柅如家人之禮贈侍中驃騎將軍諡曰康明帝與大將軍溫嶠書曰痛謝鯤未絕於口世將復至於此竝盛年雋才不遂其志痛切於心廩明古多通鯤遠有識致其言雖未足令人改聽然味之不倦近未易有也坐相視盡如何子頤之嗣仕至東海內史頤之弟胡之字修齡弱冠有聲譽歷郡守侍中丹陽尹素有風眩疾發動甚數而神明不損石虎死朝廷欲綏輯河洛以胡之爲西中郎將司州刺史假節以疾固辭未行而卒子茂之亦有美譽官至晉陵太守子敬弘義熙末爲尙書廩弟彬字世儒少稱雅正弱冠不就州郡之命光祿大夫傅祗

通志

卷一百一十五

列傳四十一

六

辟爲掾後與兄廩俱渡江爲揚州刺史劉機建武長史元帝引爲鎮東賊曹參軍轉典兵參軍豫討華軼功封都亭侯愍帝召爲尙書郎以道險不就遷建安太守徙義興內史未之職轉軍諮祭酒中興建稍遷侍中從兄敦舉兵入石頭帝使彬勞之會周顛遇害彬素與顛善先往哭顛甚慟旣而見敦敦怪其有慘容而問其所以彬曰向哭伯仁情不能已敦怒曰伯仁自致刑戮且凡人遇汝復何爲者哉彬曰伯仁長者君之親友在朝雖無謬誤亦非阿黨而赦後加之極刑所以傷惋也因勃然數敦曰兄抗旌犯順殺戮忠良謀圖不軌禍及門戶

音辭慷慨聲淚俱下敦大怒厲聲曰爾狂悖乃可至此爲吾不能殺汝邪時王導在坐爲之懼勸彬起謝彬曰有脚疾已來見天子尙欲不拜何跪之有此復何所謝敦曰脚痛孰若頸痛彬意氣自若殊無懼容後敦議舉兵向京師彬諫甚苦敦變色目左右將收彬彬正色曰君昔歲殺兄今又殺弟邪先是彬從兄豫章太守稜爲敦所害敦以彬親故容忍之俄而以彬爲豫章太守彬爲人樸素方直乏風味之好雖居顯貴常布衣蔬食遷前將軍江州刺史及敦死王含欲投王舒王應勸含投彬含曰大將軍平素與江州云何汝欲歸之應曰此乃

通志

卷宿天

列傳四十一

七

所以宜往也江州當人疆盛時能立異同此非常人所及觀襄阨必興愍惻荆州守文豈能意外行事含不從遂共投舒舒果沈含父子於江彬聞應來密具船以待之旣不至深以爲恨敦平有司奏彬及兄子安成太守籍之竝是敦近親皆除名詔曰司徒導以大義滅親其後昆雖或有違猶將百世宥之况彬等公之近親乃原之徵拜光祿勳轉度支尙書蘇峻平後改築新宮彬爲大匠以營創勳勞賜爵關內侯遷尙書右僕射卒官年五十九贈特進衛將軍加散騎常侍諡曰肅長子彭之嗣位至黃門郎次彪之最知名彪之字叔虎年二十鬚



鬢皓白時人謂之王白鬢初除佐著作郎東海王文學  
從伯導謂曰選官欲以汝爲尚書郎汝幸可作諸王佐  
邪彪之曰位之多少旣不足計自當任之於時至於超  
遷是所不願遂爲郎鎮軍將軍武陵王晞以爲司馬累  
遷尚書左丞司徒左長史御史中丞侍中廷尉時永嘉  
太守謝毅赦後殺郡人周矯矯從兄球詣州訴冤揚州  
刺史殷浩遣從事收毅付廷尉彪之以球爲獄主身無  
王爵非廷尉所料不肯受與州相反覆穆帝發詔令受  
之彪之又上疏執據時人比之張釋之時當南郊簡文  
帝爲撫軍執政訪彪之應有赦不荅曰中興以來郊祀

通志

卷一百一

列傳四十一

八

往往有赦愚意常謂非宜何者黎庶不達其意將謂郊  
祀必赦至此時凶愚之輩復生心於僥倖矣遂從之轉  
吏部尚書簡文有命用秣陵令曲安遠補句容令殿中  
侍御史奚朗補湘東郡彪之執不從曰秣陵令三品縣  
耳殿下昔用安遠談者紛然句容近畿三品佳邑豈可  
處卜術之人無才用者邪湘東雖復遠小所用未有朗  
比談者謂頗兼卜術得進殿下若超遷寒頓當令人才  
可拔朗等凡器實未足充此選太尉桓溫欲北伐屢詔  
不許溫輒下武昌人情震懼或勸殷浩引身告退彪之  
言於簡文曰此非保社稷爲殿下計皆自爲計耳若殷

浩去職人情崩駭天子獨坐旣爾當有任其責者非殿下而誰又謂浩曰彼抗表問罪卿爲其首事任如此猜覺已構欲作匹夫豈有全地邪且當靜以待之令相王以手書示以款誠陳以成敗當必旋旆若不順命卽遣中詔如復不奉乃當以正義相裁無故忽忽先自猖蹶浩曰決大事正自難頃日來欲使人悶聞卿此謀意始得了溫亦奉帝旨果不進時衆官漸多而遷徙每速彪之上議請省官并職言古人三載考績三考黜陟官少故也蓋官衆則缺多缺多則遷速今內外百官較而計

之固應有并省者矣六卿之任太常望雅而職重然其

通志

卷一百一

列傳四十一

九

所司義高務約宗正所統蓋勦可以并太常宿衛之重二衛任之其次驍騎左軍各有所領無兵軍校皆應罷廢四軍皆罷則左軍之名不宜獨立宜改游擊以對驍騎內官自侍中以下舊員皆四中興之初二人而已二人對直或有不周愚謂三人於事則無關也凡餘諸官無綜事實者可令大官隨才位所帖而領之若未能頓廢自可因缺而省之斯誠責實致治之大務也永和末多疾疫舊制朝臣家有時疾染易三人以上者身雖無疾百日不得入宮至是百官多列家疾不入彪之又言疾疫之年家無不染若以之不復入宮則直侍頓闕王

者宮省空矣朝廷從之既而長安人雷弱兒梁安等詐爲殺苻健苻眉請兵應接時殷浩鎮壽陽便進據洛營復山陵屬彪之疾歸因上簡文帝箋陳弱兒等容有詐僞浩未應輕進尋而弱兒果詐姚襄反叛浩大敗退守譙城簡文笑謂彪之曰果如君言自頃以來君謀無遺策張陳復何以過之轉領軍將軍遷尚書僕射以疾病不拜徙太常領崇德衛尉時或謂簡文曰武陵第中大修器械將謀非常也簡文以問彪之彪之曰武陵王志意盡於馳騁田獵耳願深靜之以懷異同者或復以此爲言簡文甚悅復轉尚書僕射時豫州刺史謝奕卒簡文遽使彪之舉可以代奕者對曰當今時賢備簡高監簡文曰人有舉桓雲者君謂如何彪之曰雲不必非才然溫居上流割天下之半其弟復處西藩兵權盡在一門亦非深根固蒂之宜也人才非可豫量但當令不與殿下作異者耳簡文領曰君言是也後以彪之爲鎮軍將軍會稽內史加散騎常侍居郡八年豪右斂跡亡戶歸者三萬餘口桓溫下鎮姑孰威勢震主四方修敬皆遣上佐綱紀彪之獨曰大司馬誠爲富貴朝廷既有宰相動靜之宜自當諮稟修敬若遣綱紀致貢天子復何以過之竟不遣溫以山陰縣折布米不時畢郡不彈糾

上免彪之彪之去郡郡見罪謫未上州臺者皆原散之  
温復以爲罪乃檻收下吏會赦免左降爲尚書頃之復  
爲僕射是時温將廢海西公百僚震慄温亦色動莫知  
所爲彪之既知温不臣迹已著理不可奪乃謂温曰公  
阿衡皇家便當倚傍先代耳命取霍光傳禮度儀制定  
於須臾曾無懼容温歎曰作元凱不當如是邪時廢立  
之儀既絕於曠代朝臣莫有識其故典者彪之神彩毅  
然朝服當階文武儀準莫不取定朝廷以此服之温又  
廢武陵王遵以事示彪之彪之曰武陵親尊未有顯罪  
不可以猜嫌之間便相廢徙公建立聖明遐邇歸心當

通志

卷宿天

列傳四十一

七

崇辨王室伊周同美此大事宜更深詳温曰此已成事  
卿勿復言及簡文崩羣臣疑惑未敢立嗣或云宜當須  
大司馬處分彪之正色曰君崩太子代立大司馬何容  
得異若先面諮必反爲所責矣於是朝議乃定及孝武  
帝卽位太皇太后令以帝冲幼加在諒闇令温依周公  
居攝故事事已施行彪之曰此異常大事大司馬必當  
固讓使萬機停滯稽廢山陵未敢奉令謹具封還內請  
停事遂不行温遇疾諷朝廷求九錫袁宏爲文以示彪  
之彪之視訖歎其文辭之美謂宏曰卿固大才安可以  
此示人時謝安見其文又頰使宏改之宏遂逡巡其事

既屢引日乃謀於彪之彪之曰聞彼病日增亦當不復  
支久自可更小遲廻宏從之温亦尋薨時桓沖及安夾  
輔朝政安以新喪元輔主上未能親覽萬機太皇太后  
宜臨朝彪之曰先代前朝主在襁抱母子一體故可臨  
朝太后亦不能決政事終是顧問僕與君諸人耳今上  
年出十歲垂婚冠反令從嫂臨朝示人君幼弱豈是翼  
戴讚揚立德之謂乎二君必行此事豈僕所制所惜者  
大體耳時安不欲委任桓沖故使太后臨朝決政獻替  
專在乎已彪之不達安旨故以爲言安竟不從累遷尙  
書令與安共掌朝政安每日朝之大事衆不能決者諮  
王公無不得判以年老上疏乞骸骨詔不許轉拜護軍  
將軍加散騎常侍安欲更營宮室彪之曰中興初卽位  
東府殊爲儉陋元明二帝亦不改制蘇峻之亂成帝止  
蘭臺都坐殆不蔽寒暑是以更營修築方之漢魏誠爲  
儉狹復不至陋殆合豐約之中今自可隨宜增益修補  
而已疆寇未殄正是休兵養士之時何可大興功力勞  
擾百姓邪安曰宮室不壯後世謂人無能彪之曰任天  
下事當保國寧家朝政惟允豈以修屋宇爲能邪安無  
以奪之故終彪之世不改營焉加光祿大夫儀同三司  
未拜疾篤帝遣黃門侍郎問所苦賜錢二十萬以營醫

藥太元二年卒年七十三卽以光祿爲贈諡曰簡二子越之撫軍參軍臨之東陽太守彬季父琛國子祭酒琛子稜字文子少歷清官渡江爲元帝丞相從事中郎從兄導以稜有政事宜守大郡乃出爲豫章太守加廣武將軍稜知從兄敦驕傲自負有罔上心日夕諫諍以爲宜自抑損推崇盟主且羣從一門竝相與服事應務相崇高以隆勳業每言苦切敦不能容潛使人害之弟侃亦知名少歷顯職位至吳國內史

虞潭字思奧會稽餘姚人吳騎都尉翻之孫也父忠仕至宜都太守吳之亡也堅壁不降遂死之潭清貞有檢

通志

卷一百一十五

列傳四十一

三

操州辟從事主簿舉秀才大司馬齊王冏請爲祭酒除祁鄉令徙醴陵令值張昌作亂郡縣多從之潭獨起兵斬昌別率鄧穆等襄陽太守華恢上潭領建平太守以疾固辭遂周旋征討以軍功賜爵都亭侯陳敏反潭東下討敏弟讚於江州廣州刺史王矩上潭領廬陵太守綏撫荒餘咸得其所又與諸軍共平陳恢仍轉南康太守進爵東鄉侯尋被元帝檄使討江州刺史華軼潭至廬陵會軼已平而湘川賊杜弼猶盛江州刺史衛展上潭并領安成太守時甘卓屯宜陽爲弼所逼潭進軍救卓卓上潭領長沙太守固辭不就王敦版潭爲湘東太

守復以疾辭張平後元帝召補丞相軍諮祭酒轉琅邪國中尉帝爲晉王除屯騎校尉徙右衛將軍遷宗正卿以疾告辭會王含沈充等攻逼京都潭遂於本縣招合宗人及郡中大姓共起義軍衆以萬數自假明威將軍乃進赴國難至上虞明帝手詔潭爲冠軍將軍領會稽內史潭卽受命義衆雲集時有野鷹飛集屋梁衆咸懼潭曰起大義而剛鷲之鳥來集破賊必矣遣長史孔坦領前鋒過浙江追躡充潭次于西陵爲坦後繼會充已禽罷兵徵拜尙書尋補右衛將軍加散騎常侍成帝卽位出爲吳興太守秩中二千石加輔國將軍以討充功

通志

卷三十一

列傳四十一

五

進爵零陵縣侯蘇峻反加潭督三吳晉陵宣城義興五郡軍事會王師敗績大駕逼遷潭勢弱不能獨振乃固守以俟四方之舉會陶侃等下潭與郗鑑王舒協同義舉侃等假潭節監揚州浙江西軍事潭率衆與諸軍并勢東西犄角遣督護沈伊距管商於吳縣爲商所敗潭自貶還節尋而峻平潭以母老輒去官還餘姚詔轉鎮軍將軍吳國內史復徙會稽內史未發復還吳郡以前後功進爵武昌縣侯邑一千六百戶是時軍荒之後百姓饑饉死亡塗地潭乃表出倉木振救之又修滬瀆壘以防海鈔百姓賴之咸康中進衛將軍潭貌雖和弱而

內堅明有膽決雖屢統軍旅而少有傾敗以母憂去職服闋以侍中衛將軍徵既至更拜右光祿大夫開府儀同三司給親兵二百人侍中如故年七十九卒於位追贈左光祿大夫開府侍中如故諡曰孝烈子伉嗣官至右將軍司馬伉卒子嘯父嗣嘯父少歷顯位後至侍中爲孝武帝所親愛嘗侍飲宴帝從容問曰卿在門下初不聞有獻替邪嘯父家近海謂帝有所求對曰天時尚溫鰲魚蝦鮓未可致尋當有所上獻帝大笑因飲大醉出拜不能起帝顧曰扶虞侍中嘯父曰臣位未及扶醉不及亂非分之賜所不敢當帝甚悅隆安初爲吳國內

通志

卷福三天

列傳四十一

五

史徵補尚書未發而王廙舉兵叛嘯父行吳興太守嘯父卽入吳興應廙廙敗有司奏嘯父與廙同謀罪應斬詔以祖潭舊勳聽以疾贖爲庶人四年復拜尚書桓元用事以爲太尉左司馬尋遷護軍將軍出爲會稽內史義熙初去職卒於家潭兄子驥字思行雖機幹不及於潭然而素行過之與譙國桓彝俱爲吏部郎情好甚篤彝遣溫拜驥驥使子谷拜彝歷吳興太守金紫光祿大夫王導嘗謂驥曰孔愉有公才而無公望丁潭有公望而無公才兼之者在卿乎官未達而卒時人惜之子

谷位至吳國內史



顧衆字長始吳郡吳人驍騎將軍榮之族弟也父祕交州刺史有文武才幹衆出後伯父早終事伯母以孝聞光祿大夫朱誕器之州辟主簿舉秀才除餘杭秣陵令竝不行元帝爲鎮東將軍命爲參軍以討華軼功封東鄉侯辟丞相掾祕卒州人立衆兄壽爲刺史尋爲州人所害衆往交州迎喪值杜弼之亂崎嶇六年乃還祕會苙吳興吳興義故以衆經離寇難共遺錢二百萬一無所受及帝踐阼徵拜駙馬都尉奉朝請轉尙書郎大將軍王敦請爲從事中郎上補南康太守會詔除鄱陽太守加廣武將軍衆徑之郡不過敦敦甚怪焉及敦構逆

通志

卷五十五

列傳四十一

六

令衆出軍衆遲廻不發敦大怒以軍期召衆還詰之聲色甚厲衆不爲動容敦意漸釋時敦又怒宣城內史陸皓衆又辯明之敦長史陸玩在坐代衆危懼出謂衆曰卿眞所謂剛亦不吐柔亦不茹雖仲山甫何以加之敦事捷欲以衆爲吳興內史衆固辭舉吏部郎桓彝彝亦讓衆事竝不行敦鎮姑孰復以衆爲從事中郎敦平除太子中庶子爲義興太守加揚威將軍蘇峻反王師敗績衆還吳潛圖義舉時吳國內史庾冰奔於會稽峻以蔡謨代之前陵江將軍張悉爲峻收兵於吳衆遣人喻悉悉從之衆乃遣郎中徐機告謨曰衆已潛合家兵待

時而奮又與張慙剋期效節謀乃檄衆爲本國督護揚威將軍仍舊衆從弟護軍參軍颺爲威遠將軍前鋒督護吳中人士同時響應峻遣將弘徽領甲卒五百鼓行而前衆與颺慙要擊徽戰於高荏大破之收其軍實謀以水當還任故便去郡衆遣颺率諸軍屯無錫水至鎮御亭恐賊從海虞道人衆自往備之而賊率張健馬流攻無錫颺等大敗庾永亦失守健等遂據吳城衆自海隅由婁縣東倉與賊別率交戰破之義軍又集進屯烏菴會稽內史王舒吳興內史虞潭竝檄衆爲五郡大督護統諸義軍討健潭遣將姚休爲衆前鋒與賊戰沒衆

通志

卷一百一

列傳四十一

七

還守紫壁時賊黨方銳義軍沮退人咸勸衆過浙江衆曰不然今保固紫壁可得全錢唐以南五縣若越他境便爲萬軍控引無所非長計也臨平人范明亦謂衆曰此地險要可以制寇不可委也衆乃版明爲參軍明率宗黨五百人合諸軍凡四千人復進討健健退於曲阿畱錢弘爲吳令軍次路邱卽斬弘首衆進往吳城遣督護朱祁等九軍與蘭陵太守李閔共守虔亭健遣馬流陶陽等往攻之閔與祁等逆擊大破之斬首二千餘級峻平論功衆以承檄奮義推功於謨謨以衆唱謀非己之力俱表相讓論者美之封鄱陽縣伯除平南軍司不

就更拜丹陽尹本國大中正入爲侍中轉尚書咸康末  
遷領軍將軍揚州大中正固讓未拜以母憂去職穆帝  
卽位何充執政復徵衆爲領軍不起服闋乃就是時充  
與武陵王不平衆會通其間遂得和釋充崇信佛教衆  
議其糜費每以爲言嘗與充同載經佛寺充要衆入門  
衆不下車充以衆州里宿望每優遇之以年老乞骸骨  
詔書不許遷尚書僕射永和二年卒時年七十三追贈  
特進光祿大夫諡曰靖長子昌嗣爲建康令第三子會  
中軍諮議參軍時稱美士

張闓字敬緒丹陽人吳輔吳將軍昭之曾孫也少孤有

通志

卷宿元

列傳四十一

六

志操太常薛兼進之於元帝言闓才幹貞固當今之良  
器卽引爲安東參軍甚加禮遇轉丞相從事中郎以母  
憂去職既葬帝彊起之闓固辭疾篤優命敦逼遂起視  
事及帝爲晉王拜給事黃門侍郎領本郡大中正以佐  
翼勳賜爵丹陽縣侯遷侍中帝踐阼出補晉陵內史在  
郡甚有威惠時所部四縣以旱失田闓乃立曲阿新豐  
塘溉田八百餘頃每歲豐稔葛洪爲其頌計用二十一  
萬一千四百二十功以擅興造免官後公卿竝爲之言  
曰張闓興陂溉田可謂益國而反被黜使臣下難復爲  
善帝急悟乃以闓爲大司農闓陳黜免始爾不宜便居

九列疏奏不許然後就職帝晏駕以闔爲大匠卿營建  
平陵事畢遷尙書蘇峻之役闔與王導俱入宮侍衛峻  
使闔持節權督東軍王導潛與闔謀密宣太后詔於三  
吳令速起義軍陶侃等至假闔節行征虜將軍與振威  
將軍陶回共督丹陽義軍闔到晉陵使內史劉耽盡以  
一部穀并遣吳郡度支運四部穀以給將軍郗鑑又與  
吳郡內史蔡謨前吳興內史虞潭會稽內史王舒等招  
集義兵以討峻峻平以尙書加散騎常侍賜爵宜陽伯  
遷廷尉以疾解職拜金紫光祿大夫尋卒時年六十四  
子混嗣闔箋表文議傳於世

通志

卷三十五

列傳四十一

九

陸曄字士光吳郡吳人也伯父喜吳吏部尙書父英高  
平相員外散騎常侍曄少有雅望從兄機每稱之曰我  
家世不乏公矣居喪以孝聞同郡顧榮與鄉人書曰士  
光氣息裁屬慮其性命言之傷心矣後察孝廉除永世  
烏江二縣令皆不就元帝初鎮江左辟爲祭酒尋補振  
威將軍義興太守以疾不拜預討華軼功封平望亭侯  
累遷散騎常侍本郡大中正太興元年遷太子詹事時  
帝以侍中皆北士宜兼用南人曄以清貞著稱遂拜侍  
中徙尙書領州大中正明帝卽位轉光祿勳遷太常代  
紀瞻爲尙書左僕射領太子少傅尋加金紫光祿大夫

代卞壹爲領軍將軍以平錢鳳功進爵江陵伯帝不豫  
曄與王導卞壹庾亮溫嶠郗鑑竝受顧命輔皇太子更  
入殿將兵直宿遺詔錄尚書事加散騎常侍成帝踐阼  
拜左光祿大夫開府儀同三司給親兵百人常侍如故  
蘇峻之難曄隨帝在石頭舉動方正不以凶威變節峻  
以曄吳士之望不敢加害使守雷臺匡術以苑城歸順  
時共推曄督宮城軍事峻平加衛將軍給千兵百騎以  
勳進爵爲公封次子赧新康子咸和中求歸鄉里拜墳  
墓詔許之曄因歸以疾卒時年七十四追贈侍中車騎  
大將軍諡曰穆子謙散騎常侍曄弟玩字士瑤器量淹

通志

卷百三

列傳四十一

三

雅弱冠有美名賀循每稱其清允平當郡檄綱紀東海  
王越辟爲掾皆不就元帝引爲丞相參軍時王導初至  
江左思結人情請婚於玩玩對曰培塿無松柏薰蕕不  
同器玩雖不才義不能爲亂倫之始導乃止玩嘗詣導  
食酪因而得疾與導箋曰僕雖吳人幾爲傖鬼其輕易  
權貴如此累加奮武將軍徵拜侍中以疾辭王敦請爲  
長史逼以軍期不得已乃從命敦平尚書令郗鑑議敦  
佐吏不能匡正姦惡宜皆免官禁錮會溫嶠上表申理  
得不坐復拜侍中遷吏部尚書領會稽王師讓不拜轉  
尚書左僕射領本州大中正及蘇峻反遣玩與兄曄俱

守宮城玩潛說匡術歸順以功封興平伯轉尚書令又詔授左光祿大夫開府儀同三司加散騎常侍餘如故玩頗自表讓優詔褒揚重復終於不許尋而王導郗鑑庾亮相繼而薨朝野咸以三良既沒國家殄賴以玩有德望乃遷侍中司空給羽林四十人玩既拜有人詣之索杯酒瀉置柱梁之間呪曰當今乏才以爾爲柱石莫傾人梁棟邪玩笑曰感卿良箴旣而歎息謂賓客曰以我爲三公是天下爲無人談者以爲知言玩雖登公輔謙讓不辟掾屬成帝聞而勸之玩不得已乃從命所辟皆寒素有行之士玩翼亮累世常以弘重爲人主所貴

通志

卷宿天

列傳四十一

五

性通雅不以名位格物誘納後進謙若布衣由是搢紳之徒莫不蔭其德宇以疾薨於位年六十四諡曰康給兵千人守冢七十家太元中功臣普被減削司空何充等止得六家以玩有佐命之勳先陪陵而葬由是特置興平伯官屬以衛墓子始嗣歷侍中尚書始弟納字祖言少有清操貞厲絕俗初辟鎮軍大將軍武陵王掾州舉秀才太原王述雅敬重之引爲建威長史累遷黃門侍郎本州別駕尚書吏部郎出爲吳興太守將之郡先至姑孰辭桓温因問温曰公致醉可飲幾酒食肉多少温曰年大來飲三升便醉白肉不過十臠卿復云何納

曰素不能飲止可二升肉亦不足言後伺溫閑謂之曰  
外有微禮方守遠郡欲與公一醉以展下情溫欣然納  
之時王坦之刁彝在坐及受禮唯酒一斗鹿肉一柸坐  
客愕然納徐曰明公近云飲酒三升納止可二升今有  
一斗以備杯杓餘瀝溫及賓客竝歎其率素更敕中廚  
設精饌酬飲極歡而罷納至郡不受俸祿頃之徵拜左  
民尚書領州大中正將應召外白宜裝幾船納曰私奴  
裝糧食來無所復須也臨發止有被襪而已其餘竝封  
以還官遷太常徙吏部尚書加奉車都尉衛將軍謝安  
嘗詣納而納殊無供辦其兄子倝不敢問之乃密爲之

通志

卷宿天

列傳四十一

三

具安旣至納所設唯茶果而已倝遂陳盛饌珍羞畢具  
客罷納大怒曰汝不能光益父叔乃復穢我素業邪於  
是杖之四十其舉措多此類後以愛子長生有疾求解  
官營視兄子禽又犯法應刑乞免官謝罪詔特許輕降  
頃長生小佳喻還攝職尋遷尚書僕射轉左僕射加散  
騎常侍俄拜尚書令常侍如故恪勤貞固始終不渝時  
會稽王道子以少年專政委任羣小納望闕而歎曰好  
家居織兒欲撞壞之邪朝士咸服其忠亮尋除左光祿  
大夫開府儀同立司未拜而卒卽以爲贈長生先卒無  
子以弟子道隆嗣元熙中爲廷尉

何充字次道廬江灑人魏光祿大夫禎之曾孫也祖憚  
豫州刺史父獻安豐太守充風韻淹雅文義見稱初辟  
大將軍王敦掾轉主簿敦兄舍時爲廬江郡貪汙狼籍  
敦嘗於座中稱曰家兄在郡定佳廬江人士咸稱之充  
正色曰充卽廬江人所聞異於此敦默然傍人皆爲之  
不安充晏然自若由是忤敦左遷東海王文學尋屬敦  
敗累遷中書侍郎充卽王導妻之姊子充妻明穆皇后  
之妹也故少與導善早歷顯官嘗詣導導以塵尾指牀  
呼充共坐曰此是君座也導繕揚州解舍顧而言曰正  
爲次道耳明帝亦友暉之成帝卽位遷給事黃門侍郎

通志

卷百天

列傳四十一

三

蘇峻作亂京都傾覆導從駕在石頭充東奔義軍其後  
導奔白石充亦得還賊平封都鄉侯拜散騎常侍出爲  
東陽太守仍除建威將軍會稽內史在郡甚有德政薦  
徵士虞喜枚郡人謝奉魏顛等以爲佐吏後以墓被發  
去郡詔徵侍中不拜改葬畢除建威將軍丹陽尹王導  
庾亮竝言於帝曰何充器局方槩有萬夫之望必能總  
錄朝端爲老臣之副臣死之日願引充內侍則外譽唯  
緝社稷無虞矣由是加吏部尙書進號冠軍將軍又領  
會稽王師及導薨轉護將軍與中書監庾冰參錄尙  
書事詔充冰各以甲仗五十人至止車門尋遷尙書令



加左將軍充以內外統任宜相糾正若使事綜一人於課對爲嫌乃上疏固讓許之徙中書令加散騎常侍領軍如故又領州大中正以州有先達宿德固讓不拜庾冰兄弟以舅氏輔王室權侔人主慮易世之後戚屬轉疎將爲外物所攻謀立康帝卽帝母弟也每說帝以國有疆敵宜須長君帝從之充建議曰父子相傳先王舊典忽妄改易懼非長計故武王不授聖弟卽其義也昔漢景亦欲傳祚梁王朝臣咸謂汙亂典制據而弗聽今琅邪踐阼如孺子何社稷宗廟將其危乎冰等不從旣而康帝立帝臨軒冰充侍坐帝曰朕嗣鴻業二君之力

通志

卷宿天

列傳四十一

五

也充對曰陛下龍飛臣冰之力也若如臣議不覩升平之世帝有慙色建元初出爲驃騎將軍都督徐州揚州之晉陵諸軍事假節領徐州刺史鎮京口以避諸庾頃之庾翼將北伐庾冰出鎮江州充入朝言於帝曰臣冰舅氏之重宜居宰相不應遠出朝議不從於是徵充入爲都督揚豫徐州之琅邪諸軍事假節領揚州刺史將軍如故先是翼悉發江荆二州編戶奴以充兵役士庶嗷然充復欲發揚州奴以均其謗後以中興時已發三吳今不宜復發而止俄而帝疾篤冰翼意在簡文帝而充建議立皇太子奏可及帝崩充奉遺旨便立太子是

爲穆帝水翼深恨之獻后臨朝詔曰驃騎任重可以用甲  
杖百人入殿又加中書監錄尙書事充自陳旣錄尙書  
不宜復監中書許之復加羽林騎十人水翼等尋卒充  
專輔幼主翼臨終表以後任委息爰之于時論者並以  
諸庾世在西藩人情所歸宜依翼所請以安物情充曰  
不然荆楚國之西門戶口百萬北帶彊胡西鄰勁蜀經  
略險阻周旋萬里得賢則中原可定勢弱則社稷同憂  
所謂陸抗存則吳存抗亡則吳亡者豈可以白面年少  
猥當此任哉桓溫英略過人有文武識度西夏之任無  
出溫者議者又曰庾爰之肯避溫乎如令阻兵恥懼不

通志

卷一百一十五

列傳四十一

五

淺充曰溫足能制之諸君勿憂乃使溫西爰之果不敢  
爭充以衛將軍褚裒皇太后父宜綜朝政上疏薦裒參  
錄尙書裒以地逼固求外出充每曰桓溫褚裒爲方伯  
殷浩居門下我可無勞矣充居宰相雖無澄正改革之  
能而彊力有器局臨朝正色每以社稷爲己任凡所選  
用皆以功臣爲先不以私恩樹親戚談者以此重之然  
所昵庸雜信任不得其人而性好釋典崇修佛寺供結  
沙門以百數糜費巨億而不吝也親友至於貧乏無所  
施遺以此獲譏於世阮裕嘗戲之曰卿志大宇宙勇邁  
終古充問其故裕曰我圖數千戶郡尙未能得卿圖作

佛不亦大乎于時郗愔及弟曇奉天師道而充與弟準崇信釋氏謝萬譏之云二郗詔於道二何佞於佛充能飲酒雅爲劉惔所貴惔每云見次道飲令人欲傾家釀言其能溫克也永和二年卒時年五十五贈司空諡曰文穆無子弟子放嗣卒又無子又以兄孫松嗣位至驃騎諮議參軍充弟準見外戚傳

褚翬字謀遠太傅裒之從父兄也父顧少知名早卒翬以才藝楨幹稱襲爵關內侯補冠軍將軍于時長沙王又擅權成都河閒阻兵于外翬知內難方作乃棄官避地幽州後河北有寇難復還鄉里河南尹舉翬行本縣

通志

卷四十五

列傳四十一

五

事及天下鼎沸翬招合同志將圖過江先移住陽城界潁川庾敳卽翬之舅也亦憂世亂以家付翬翬道斷不得前東海王越以爲參軍辭疾不就尋洛陽覆沒與滎陽太守郭秀共保万氏臺秀不能綏衆與將陳撫郭重等構怨遂相攻擊翬懼禍及謂撫等曰以諸君所以在此謀逃難也今宜共勦力以備賊幸無外難而內自相擊是避阬落井也郭秀誠爲失理應且容之若遂所忿城內自潰胡賊聞之指來掩襲諸君雖得殺秀無解胡虜矣累弱非一宜深思之撫等悔悟與秀交和時數萬口賴翬獲全明年率數千家將謀東下過道險不得進

因畱密縣司隸校尉荀組以爲參軍廣武將軍復領本縣率邑人三千督新城梁陽城三郡諸營事頃之遷司隸司馬仍督營事率衆進至汝水柴肥口復沮賊翳乃單馬至許昌見司空荀藩以爲振威將軍行梁國內史建興中復爲豫州司馬督司州軍事太傅參軍王元代翳爲郡時梁國部曲將耿奴甚得人情而專勢翳常優遇之元爲政旣急翳知其不能容奴因戒之曰卿威殺已多而人情難一宜深慎之元納翳言外羈縻奴而內懷憤會遷爲陳畱將發乃收奴斬之奴餘黨聚衆殺元梁郡旣有內難而徐州賊張平等欲掩襲之郡人遑惑

通志

卷四十五

列傳四十一

七

將以郡歸平荀組遣翳往撫之衆心乃定頃之組舉翳爲吏部郎不應召遂東渡江元帝爲晉王以翳爲散騎郎轉太子中庶子出爲奮武將軍淮南內史永昌初王敦構逆征西將軍戴若思令翳出軍赴難翳遣將領五百人從之明帝卽位徵拜屯騎校尉遷太子左衛率成帝初爲左衛將軍蘇峻之役朝廷戒嚴以翳爲侍中典征討軍事旣而王師敗績司徒王導謂翳曰至尊當御正殿君可啓令速出翳卽入上閤躬自抱帝登太極前殿導升御牀抱帝翳及鍾雅劉超侍立左右時百官奔散殿省肅然峻兵旣入叱翳令下翳正立不動呵之曰

蘇冠軍來覲至尊軍人豈得侵逼由是兵士不敢上殿及峻執政猶以爲侍中從乘與幸石頭明年與光祿大夫陸曄等出據苑城蘇逸任讓圍之翠等固守賊平以功封長平縣伯遷丹陽尹時京邑焚蕩人物凋殘翠收集散亡甚有惠政代庾亮爲中護軍鎮石頭尋爲領軍徙五兵尚書加奉車都尉監新宮事遷尚書右僕射轉左僕射加散騎常侍久之代何充爲護軍將軍常侍如故咸康七年卒時年六十七贈衛將軍諡曰穆子希嗣官至豫章太守

蔡謨字道明陳留考城人也世爲著姓曾祖睦魏尚書通志

卷一百一

列傳四十一

三

祖惠樂平太守父克少好學博涉書記爲邦族所敬性公亮守正行不合己雖富貴不交也高平劉整恃才縱誕服飾詭異無所拘忌嘗行造人遇克在座整終席慙不自安克時爲處士而見憚如此後爲成都王穎大將軍記室穎爲丞相擢爲東曹掾克素有格量及居選官苟進之徒望風畏憚初克未仕時山簡嘗與琅邪王衍書曰蔡子尼今之正人衍以書示衆曰山子以一字拔人然未易可稱後衍聞克在選官曰山子正人之言驗於今矣陳留時爲大郡號稱多士琅邪王澄行經其界太守呂豫遣吏迎之澄入境問吏曰此郡人士爲誰吏

曰有蔡子尼江應元是時郡人多居大位者澄以其姓名問曰甲乙等非君郡人邪吏曰是也曰然則何以但稱此二人吏曰向謂君侯問人不謂問位澄笑而止到郡以吏言謂豫曰舊名此郡有風俗果然小吏亦知如此克以朝政日弊遂絕不仕東嬴公騰爲車騎將軍鎮河北以克爲從事中郎知必不就以軍期致之克不得已至數十日騰爲汲桑所攻城陷克見害謀弱冠察孝廉州辟從事舉秀才東海王越召爲掾皆不就避亂渡江時明帝爲東中郎將引爲參軍元帝拜丞相復辟爲掾轉參軍後爲中書侍郎歷義興太守大將軍王敦從

通志

卷一百一十五

列傳四十一

完

事中郎司徒左長史遷侍中蘇峻構逆吳國內史庾冰出奔會稽乃以謨爲吳國內史謨旣至與張闓顧衆顧颺等共起義兵迎冰還郡峻平復爲侍中遷五兵尚書領琅邪王師謨上疏讓詔不許轉掌吏部以平蘇峻勳賜爵濟陽男又讓不許冬蒸謨領祠部主者忘設明帝位與太常張泉俱免白衣領職頃之遷太常領祕書監以疾不堪親職上疏自解不聽成帝臨軒遣使拜太傅太尉司空會將作樂宿懸於殿庭門下奏非祭祀燕享則無設樂之制事下太常謨議臨軒遣使宣有金石之樂遂從之臨軒作樂自此始也彭城王紘上言樂賢堂

有先帝手畫佛像經歷寇難而此堂猶存宜敕作頌帝  
下其議謨曰佛者夷狄之俗非經典之制先帝量同天  
地多才多藝聊恩臨時而畫此像至於雅好佛道所未  
承聞也盜賊奔突王都墮敗而此堂塊然獨存斯誠神  
靈保祚之徵然未是大晉盛德之形容歌頌之所先也  
人臣覩物興義私作賦頌可也今欲發王命敕吏官上  
稱先帝好佛之志下爲夷狄作一像之頌於義有疑焉  
於是遂寢時征西將軍庾亮以石勒新死欲移鎮石城  
爲滅賊之漸事下公卿謨議曰時有否泰道有屈伸暴  
逆之寇雖終滅亡然當其彊盛皆屈而避之是以高祖

通志

卷一百一

列傳四十一

字

受黜於巴漢忍辱於平城也若爭彊於鴻門則亡不終  
日故蕭何曰百戰百敗不死何待也原始要終歸於大  
濟而已豈與當亡之寇爭遲速之間哉夫唯鴻門之不  
爭故垓下莫能與之爭文王身圯於羗里故道泰於牧  
野勾踐見屈於會稽故威申於彊吳今日之事亦猶此  
矣賊假息之命垂盡而豺狼之力尙彊宜抗威以待時  
或曰抗威待時時已可矣愚以爲時之可否在賊之彊  
弱賊之彊弱在石虎之能否虎之能否可得而言矣自  
勒初起則虎爲爪牙百戰百勝遂定中國境土所據同  
於魏世及勒死之日將相內外欲誅石虎石虎獨起於

衆異之中殺嗣主誅寵臣內難既定千里遠出一攻而拔金墉再戰而斬石生禽彭彪殺石聰滅郭權還據根本內外竝定四方鎮守不失尺寸詳察此事豈能乎將不能也假令不能者爲之其將濟乎將不濟也賊前攻襄陽而不能拔誠有之矣不信百戰之效而執一攻之驗棄多從少於理安乎譬若射者百發而一中可謂之拙乎且不拔襄陽者非石虎之身也桓平北守邊之將耳賊前攻之爭疆場耳得之爲善不得則止非其所急也今征西之往則異於是何者重鎮也名賢也中國之人所聞而歸心也今而西度實有席卷河南之勢賊

通志

卷一百一

列傳四十一

三

所大懼豈與桓宣同哉石虎必率其精兵身來距爭若欲與戰戰何如石生若欲城守守何如金墉若欲阻沔沔何如大江蘇峻何如石虎凡此數者宜詳校之愚謂石生猛將關中精兵征西之戰不能勝也金墉險固劉曜十萬所不能拔今征西之守不能勝也又是時兗州洛陽關中皆舉兵擊石虎此今三處反爲其用方之於前倍半之境也若石生不能敵其半而征西欲當其倍愚所疑也蘇峻之彊不及石虎沔水之險不及大江大江不能禦蘇峻而以沔水禦石虎又所疑也昔祖士稚在譙佃於城北慮賊來攻因以爲資故豫安軍屯以禦



其外穀將熟賊果至丁夫戰於外老弱獲於內多持炬  
火急則燒穀而走如此數年竟不得其利是時賊惟據  
沔北方之於今四分之一耳士稚不能扞其一而征西  
欲禦其四又所疑也或云賊若多來則必無糧然致糧  
之難莫過峭函而石虎昔涉此險深入敵國平關中而  
後還今至襄陽路既無險又行其國內自相供給方之  
於前難易百倍前已經至難而謂今不能濟其易又所  
疑也然此所論但說征西既至之後耳尙未論道路之  
慮也自沔已西水急岸高魚貫泝流首尾百里若賊無  
宋襄之義及我未陣而擊之將如之何今王士與賊水

通志

卷三十一

列傳四十一

三

陸異勢便習不同寇若送死雖開江延敵以一當千猶  
吞之有餘宜誘而致之以保萬全棄江遠進以我所短  
擊彼所長懼非廟勝之算朝議同之故亮不果移鎮初  
皇后每年拜陵勞費甚多謨建議曰古者皇后廟見而  
已不拜陵也由是遂止及太尉郗鑑疾篤出謨爲太尉  
軍司加侍中鑑卒卽拜謨爲征北將軍都督徐兗青三  
州揚州之晉陵豫州之沛郡諸軍事領徐州刺史假節  
時左衛將軍陳光上疏請伐胡詔令攻壽陽謨上疏曰  
今壽陽城小而固自壽陽至琅邪城壁相望其間遠者  
裁百餘里一城見攻衆城必救且王師在路五十餘日

劉仕一軍早已入淮又遣數部北取生壁大軍未至聲  
息久聞而賊之郵驛一日千里河北之騎足以來赴非  
唯鄰城相救而已夫以白起韓信項籍之勇猶發梁焚  
舟背水而陣今欲停船水渚引兵造城前對堅敵顧臨  
歸路此兵法之所誠也若進攻未拔胡騎卒至懼桓子  
不知所爲而舟中之指可拘今征軍五千皆王都精銳  
之衆又光爲左衛遠近聞之名爲殿下之軍宜令所向  
有征無戰而頓之堅城之下勝之不武不勝爲笑今以  
國之上駟擊寇之下邑得之則利薄而不足損敵失之  
則害重而足以益寇懼非策之長者臣愚以爲聞寇而

通志

卷一百一

列傳四十一

三

致討賊退而振旅於事無失不勝管見謹冒陳聞石虎  
於青州造船數百掠緣海諸縣所在殺戮朝廷以爲憂  
謨遣龍驤將軍徐元等守中洲竝設募若得賊大白船  
者賞布千疋小船百疋是時謨所統七千餘人所戍東  
至土山西至江乘鎮守八所城壘凡十一處烽火樓望  
三十餘處隨宜防備甚有算略先是郗鑑上部下有勳  
勞者凡一百八十人帝竝酬其功未卒而鑑薨斷不復  
與謨上疏以爲先已許鑑今不宜斷且鑑所上者皆積  
年勳效百戰之餘亦不可不報詔聽之康帝卽位徵拜  
左光祿大夫開府儀同三司領司徒代殷浩爲揚州刺

史又錄尚書事領司徒如故初謨沖讓不辟僚佐詔屢敦逼之始取椽屬石虎死中國大亂時朝野咸謂當太平復舊謨獨謂不然語所親曰胡滅誠大慶也然將貽王室之憂或曰何哉謨曰夫能順天而奉時濟六合於草昧若非上哲必由英豪度德量力非時賢所及必將經營分表疲人以逞志才不副意略不稱心財單力竭智勇俱屈此韓盧東郭所以雙斃也遷侍中司徒上疏讓不拜皇太后詔不許謨猶固讓謂所親曰我若爲司徒將爲後代所哂義不敢拜也皇太后遣使喻旨自四年冬至五年末詔書屢下謨固守所執六年復上疏以疾病乞骸骨上左光祿大夫領司徒印綬章表十餘上穆帝臨軒遣侍中紀瓌黃門郎丁纂徵謨謨陳疾篤使主簿謝攸對曰臣謨不幸有公族穆子之疾天威不違顏咫尺不敢奉詔寢伏待罪自旦至申使者十餘反而謨不至時帝年八歲甚倦問左右曰所召人何以至今不來臨軒何時當竟君臣俱疲弊皇太后詔必不來者宜罷朝中軍將軍殷浩奏免吏部尚書江彪官簡文時爲會稽王命曹曰蔡公傲違上命無人臣之禮若人主卑屈於上大義不行於下亦不知復所以爲政矣於是公卿奏曰司徒謨頃以常疾久邁王命皇帝臨軒百寮

齊立俯僂之恭有望於謨若志存止退自宜致辭闕庭  
安有人君卑勞終日而人臣曾無一酬之禮悖慢傲上  
罪同不臣臣等參議宜明國憲請付廷尉以正刑書謨  
懼率子弟素服詣闕稽顙躬到廷尉待罪皇太后詔特  
免爲庶人謨旣被廢杜門不出終日講誦教授弟子數  
年皇太后復詔以謨爲左光祿大夫開府儀同三司於  
是遣謁者僕射孟洪就加冊命謨上疏陳謝以疾篤不  
任朝請詔賜几杖門施行馬十二年卒時年七十六贈  
贈之禮一依太尉陸玩故事詔贈侍中司空諡曰文穆  
謨博學於禮儀宗廟制度多所議定文筆論議有集行

通志

卷四十一

列傳四十一

三

於世總應劭已來注班固漢書者爲之集解謨初渡江  
見彭蜺大喜曰蟹有八足加以二螯令烹之旣食吐下  
委頓方知非蟹後詣謝尙而說之尙曰卿讀爾雅不熟  
幾爲勤學死謨性方雅丞相王導作女技施設牀席謨  
先在坐不悅而去導亦不止之性尤篤慎每事必爲過  
防故時人云蔡公過浮航脫帶腰舟長子邵永嘉太守  
少子系有才學文義位至撫軍長史

諸葛恢字道明琅邪陽都人也祖誕魏司空爲文帝所  
誅父靚奔吳爲大司馬吳平逃竄不出武帝與靚有舊  
靚姊又爲琅邪王妃帝知靚在姊間因就見焉靚逃于

廩帝又逼見之謂曰不謂今日復得相見覩流涕曰不能漆身皮面復覩聖顏詔以爲侍中固辭不拜歸于鄉里終身不向朝廷而坐恢弱冠知名試守卽邱長轉臨沂令爲政和平值天下大亂避地江左名亞王導庾亮導嘗謂曰明府當爲黑頭公及導拜司空恢亦在坐導指冠謂曰君當復着此導嘗與恢戲爭族姓曰人言王葛不言葛王也恢曰不言馬驢而言驢馬豈驢勝馬邪其見親狎如此于時潁川荀闔字道明陳雷蔡謨字道明與恢俱有名譽號曰中興三明人爲之語曰京師三明各有名蔡氏儒雅荀葛清元帝爲安東將軍以恢爲

通志

卷宿天

列傳四十一

三六

主簿再遷江寧令討周馥有功封博陵亭侯復爲鎮東參軍與卞壺竝以時譽遷從事中郎兼統記室時四方多務箋疏殷積斟酌酬答咸命折中于時王氏爲將軍而恢兄弟及顏含竝居顯要劉超以忠謹掌書命時人以帝善任一國之才愍帝卽位徵用四方賢雋召恢爲尙書郎元帝以經緯須才上疏畱之承制調爲會稽太守臨行帝爲置酒謂曰今之會稽昔之關中足食足兵在於良守以君有蒞任之方是以相屈四方分崩當匡振圯運政之所先君爲言之恢陳謝因對曰今天下喪亂風俗陵遲宜尊五美屏四惡進忠實退浮華帝深

納焉太興初以政績第一詔增秩中二千石頃之以母憂去官服闋拜中書令王敦上恢爲丹陽尹以久疾免明帝征敦以恢爲侍中加奉車都尉討王含有功進封建安伯以先爵賜次子虓爲關內侯又拜恢後將軍會稽內中徵爲侍中遷左民尙書武陵王師吏部尙書累遷尙書右僕射加散騎常侍銀青光祿大夫領選本州大中正尙書令常侍吏部如故成帝踐阼加侍中金紫光祿大夫卒年六十二贈左光祿大夫儀同三司贈之禮一依太尉興平伯故事諡曰敬嗣以太牢子虓嗣位至散騎常侍恢兄頤字道回亦爲元帝所器重終於

通志

卷宿天

列傳四十一

七

太常

殷浩字深源陳郡長平人也父羨字洪喬爲豫章太守都下人士因其致書者百餘函行次石頭皆投之水中曰沈者自沈浮者自浮殷洪喬不爲致書郵其資性介立如此終於光祿勳浩識度清遠弱冠有美名尤善元言與叔父融俱好老易融與浩曰談則辭屈著篇則融勝浩由是爲風流談論者所宗或問浩曰將莅官而夢棺將得財而夢糞何也浩曰棺本臭腐故將官而夢尸錢本糞土故將得錢而夢穢時人以爲名言三府辟皆不就征西將軍庾亮引爲記室參軍累遷司徒左長史

安西庾翼復請爲司馬除侍中安西軍司竝稱疾不起  
遂屏居墓所幾將十年于時擬之管葛王濛謝尙猶伺  
其出處以下江左興亡因相與省之知浩有確然之志  
旣反相謂曰深源不起當如蒼生何庾翼貽浩書勉令  
一出固辭不起建元初庾水兄弟及何充等相繼卒簡  
文帝時在藩始綜萬機衛將軍褚裒薦浩徵爲建武將  
軍揚州刺史浩上疏陳讓并致箋於簡文具自申敘簡  
文答書敦喻浩頻陳讓自三月至七月乃受拜焉時桓  
溫旣滅蜀威勢轉振朝廷憚之簡文以浩有盛名朝野  
推伏故引爲心膂以抗於溫於是與溫頗相疑貳會遭

通志

卷一百一

列傳四十一

三

父憂去職時以蔡謨攝揚州以俟浩服闋徵爲尙書僕  
射不拜復爲建武將軍揚州刺史遂參綜朝權潁川荀  
羨少有令問浩擢爲義興吳郡以爲羽翼王羲之密說  
浩羨令與桓溫和不宜內構嫌隙浩不從及石虎死  
胡中大亂朝廷欲遂蕩平關河於是浩爲中軍將軍  
假節都督揚豫徐兗青五州軍事浩旣受命以中原爲  
已任上疏北征許洛將發墜馬衆咸惡之旣而以淮南  
太守陳達兗州刺史蔡裔爲前鋒安西將軍謝尙北中  
郎將荀羨爲督統開江西膠音流田千頃以爲軍儲師次  
壽陽潛誘村健大臣梁安雷弱兒等使殺健許以關右

之任初降人魏脫卒其弟憬代領部曲姚襄殺憬以并  
其衆浩大惡之使龍驤將軍劉啓守譙遷襄於梁旣而  
魏氏子弟往來壽陽襄益猜懼俄而襄部曲有欲歸浩  
者襄殺之浩於是謀誅襄會苻健殺其大臣健兄子眉  
自洛陽西奔浩以爲梁安事捷意苻健已死請進屯洛  
陽修復園陵使襄爲前驅冠軍將軍劉洽鎮鹿臺建武  
將軍劉遜據倉垣又求解揚州專鎮洛陽詔不許浩旣  
至許昌會張遇反謝尙又敗績浩還壽陽復進軍次山  
桑而襄反浩懼棄輜重退保譙城器械軍儲皆爲襄所  
掠士卒多亡叛浩遣劉啓王彬之擊襄於山桑竝爲襄  
所殺桓温素惡浩及聞其敗上疏罪浩坐廢爲庶人徙  
于東陽之信安縣浩少與温齊名而每心競温嘗問浩  
君何如我浩曰我與我周旋久寧作我也温旣以雄豪  
自許每輕浩浩不之憚也至是温語人曰少時吾與浩  
共騎竹馬我棄去浩輒取之故當出我下也又謂郗超  
曰浩有德有言向使作令僕足以儀刑百揆朝廷用違  
其才耳浩雖被黜放口無怨言夷神委命談詠不輟雖  
家人不見其有流放之感但終日書空作咄咄怪事四  
字而已浩甥韓伯浩素愛賞之隨至徙所經歲還都浩  
送至渚側詠曹顏遠詩云富貴他人合貧賤親戚離因



而泣下後溫將以浩爲尙書令遺書告之浩欣然許焉  
將答書慮有謬誤開閉者數十遂達空函大忤溫意由  
是遂絕永和十二年卒子涓亦有美名咸安初桓溫廢  
太宰武陵王晞誣涓及庾倩與晞謀反害之浩後將改  
葬其故吏顧悅之上疏爲浩訟冤疏奏詔追復浩本官  
顧悅之字君叔少有義行與簡文同年而髮早白帝問  
其故對曰松柏之姿經霜猶茂蒲柳常質望秋先零簡  
文悅其對始將抗表訟浩浩親故多謂非宜悅之決意  
以聞又與朝臣爭論故衆無以奪焉時人咸稱之爲州  
別駕歷尙書右丞卒子凱之別有傳蔡裔者有勇氣聲

通志

卷一百一

列傳四十一

四

若雷震嘗有二偷入室裔拊牀一呼而盜俱殞故浩委  
以軍鋒焉

孔愉字敬康會稽山陰人也其先世居梁國會祖潛太  
子少傅漢末避地會稽因家焉祖竺吳豫章太守父恬  
湘東太守從兄侃大司農俱有令名江左愉年十三而  
孤養祖母以孝聞與同郡張茂字偉康丁潭字世康齊  
名時人號曰會稽三康吳平愉遷于洛惠帝末歸鄉里  
行至江淮間遇石水封雲爲亂雲逼愉爲參軍不從將  
殺之賴雲司馬張統營救獲免東遷會稽入新安山中  
改姓孫氏以稼穡讀書爲務信著鄰里後忽捨去皆謂

爲神人而爲之立祠永嘉中元帝始以安東將軍鎮揚州命愉爲參軍邦族尋求莫知所在建興初始出應召爲丞相掾仍除駙馬都尉參丞相軍事時年已五十矣以討華軼功封餘不亭侯愉嘗行經餘不亭見籠龜於路者愉買而放之溪中龜中流左顧者數四及是鑄侯印而印龜左顧三鑄如初印工以告愉乃悟遂佩焉帝爲晉王使長兼中書郎于時刁協劉隗用事王導頗見踈遠愉陳導忠賢有佐命之勳謂事無大小皆宜諮訪由是不合旨出爲司徒左長史累遷吳興太守沈充反

愉棄官還京師拜御史中丞遷侍中太常及蘇峻反愉

通志

卷三十三

列傳四十一

聖

朝服守宗廟初愉爲司徒長史以平南將軍溫嶠母亡遭亂不葬乃不過其品至是峻平而嶠有重功愉往石頭詣嶠嶠執愉手流涕曰天下喪亂忠孝道廢能持古人之節歲塞不凋者唯君一人耳時人咸稱嶠居公而重愉之守正尋徙大尚書遷安南將軍江州刺史不行轉尚書右僕射領東海王師尋遷左僕射咸和八年詔曰尚書令玩左僕射愉竝恪居官次祿不代耕端右任重先朝所崇其給玩親信三十人愉二十人稟賜愉上疏固讓優詔不許愉復表讓從之愉表有云姦吏擅權暴人肆虐者王導聞而非之於都坐謂愉曰君言姦吏

擅威暴人肆虐爲患是誰愉欲大論朝廷得失陸玩抑之乃止後導將以趙允爲護軍愉謂導曰中興已來處此官者周伯仁應思遠耳今誠乏才豈宜以趙允居之邪導不從其守正如此由是爲導所銜後省左右僕射以愉爲尙書僕射愉年在懸車累乞骸骨不許轉護軍將軍加散騎常侍復徙領軍將軍加金紫光祿大夫領國子祭酒頃之出爲鎮軍將軍會稽內史加散騎常侍句章縣有漢時舊陂毀廢數百年愉自巡行脩復故堰溉田二百餘頃皆有良業在郡三年乃營山陰湖南侯山下數畝地爲宅草屋數間便棄官居之送資數百萬悉無所取病篤遺令斂以時服鄉邑義賙一不得受年七十五咸康八年卒贈車騎將軍開府儀同三司諡曰貞三子閻汪安國閻嗣爵位至建安太守閻子靜字季恭再爲會稽內史累遷尙書左僕射加後將軍汪字德澤好學有志行孝武帝時位至侍中時茹千秋以佞媚見幸於會稽王道子汪屢言之於帝帝不納遷尙書太常卿以不合意求出爲假節都督交廣二州諸軍事征虜將軍平越中郎將廣州刺史甚有政績爲嶺表所稱太元十七年卒安國字安國年小諸兄三十餘歲羣從諸兄竝乏才名以富彊自立惟安國與汪少厲孤貧之

通志

卷一百一

列傳四十一

聖

操汪旣以直亮稱安國以儒素顯孝武帝時甚蒙禮遇  
仕歷侍中太常及帝崩安國形素羸瘦服衰經涕泗竟  
日見者以爲眞孝再爲會稽內史領軍將軍安帝隆安  
中詔以本官領東海王師後歷尚書左右僕射義熙四  
年卒贈左光祿大夫弟祗字承祖太守周札命爲功曹  
史札爲沈充所害故人賓吏莫敢近者祗冒刃號哭親  
行殯禮送喪還義興時人義之愉從子坦字君平祖冲  
丹陽太守父侃大司農坦少方直有雅望善左氏傳解  
屬文元帝爲晉王以坦爲世子文學東宮建補太子舍  
人遷尚書郎時臺郎初到竝加策試帝手策問曰吳興  
徐馥爲賊殺郡將郡今應舉孝廉不坦對曰四罪不相  
及殛鯨而興禹徐馥爲逆何妨一郡之賢又問姦臣賊  
君汙宮瀦宅莫大之惡也鄉舊廢四科之選今何所依  
坦曰季平子逐魯昭公豈可以廢仲尼也竟不能屈先  
是以兵亂之後務存慰悅遠方秀孝到不策試普皆除  
署至是帝申明舊制皆令試經有不中科刺史太守免  
官太興二年秀孝多不敢行其有到者竝託疾帝欲除  
署孝廉而秀才如前制坦奏議以爲不可帝納焉聽孝  
廉申至七年秀才如故時典客令萬默領諸胡胡人相  
誣朝廷疑默有所偏助將加大辟坦獨不署由是被譴

遂棄官歸會稽久之除領軍司馬未赴召會王敦反與右衛將軍虞潭俱在會稽起義而討沈充事平始就職揚州刺史王導請爲別駕咸和初遷尚書左丞深爲臺中之所敬憚尋屬蘇峻反坦與司徒司馬陶回白王導曰及峻未至宜急斷阜陵之界守江西當利諸口彼少我衆一戰決矣若峻未來可往逼其城今不先往峻必先至先人有奪人之功時不可失導然之庾亮以爲峻脫徑來是襲朝廷虛也故計不行峻遂破姑熟取鹽米亮方悔之坦謂人曰觀峻之勢必破臺城自非戰士不須戎服旣而臺城陷戎服者多死白衣者無他時人稱

通志

卷一百一

列傳四十一

四

其先見及峻挾天子幸石頭坦奔陶侃侃引爲長史時侃等夜築白石壘至曉而成聞峻軍嚴聲咸懼來攻坦曰不然若峻攻壘必須東北風急令我水軍不得往救今天清靜賊必不動決遣軍出江乘掠京口以東矣果如所籌時郗鑑鎮京口侃等各以兵會旣至坦議以爲本不應須召郗公遂使東門無限今宜遣還雖晚猶勝不也侃等猶疑坦固爭甚切始令郗鑑還據京口遣郭默屯大業及令驍將李閔曹統周光與默并力賊遂勢分卒如坦計及峻平以坦爲吳郡太守自陳吳多賢豪而坦年少未宜臨之王導庾亮竝欲用坦爲丹陽尹時

亂離之後百姓凋弊坦固辭之導等猶未之許坦慨然曰昔肅祖臨崩諸君親據御牀共奉遺詔孔坦踈賤不在顧命之限既有艱難則以微臣爲先今猶俎上肉任人膾臠耳乃拂衣而去導等亦止於是遷吳興內史封晉安男加建威將軍以歲饑運家米以振窮乏百姓賴之時使坦募江淮流人爲軍有殿中兵因亂東還來應坦募坦不知而納之或諷朝廷以坦藏叛兵遂坐免尋拜侍中咸康元年石聰寇歷陽王導爲大司馬討之請坦爲司馬會石勒新死石虎專恣石聰及譙郡太守彭彪等各遣使請降坦與聰書譬以禍福詞旨可觀然朝廷遂不北伐人皆懷恨坦在職數年遷侍中時成帝每幸丞相王導府拜導妻曹氏有同家人坦每切諫時帝刻日納后而尙書左僕射王彬卒議者以爲欲却期坦曰婚禮之重重於救日蝕救日蝕有后之喪太子墮井則止納后盛禮豈可以臣喪而廢從之及帝旣加元服猶委政王導坦每發憤以國事爲已憂嘗從容言於帝曰陛下春秋以長聖敬日躋宜博約朝臣諮諏善道由是忤導出爲廷尉卿怏怏不悅以疾去職加散騎常侍遷尙書未拜疾篤庾氷省之乃流涕坦慨然曰大丈夫將終不問安國寧家之術乃作兒女相問邪氷深謝焉

臨終與庾亮書以恢復爲託俄卒時年五十一追贈光祿勳諡曰簡亮報其書并致祭焉子混嗣愉從子嚴字彭祖祖父奕全椒令明察過人時有遺其酒者始提入門奕遙呵之曰人餉吾兩甕酒其一何故非也檢視之一甕果是水或問奕何以知之奕曰酒重水輕提酒者手有輕重之異故耳在官有惠化及卒市人若喪慈親焉父倫黃門郎嚴少仕州郡歷司徒掾尙書殿中郎殷浩臨揚州請爲別駕遷尙書左丞時朝廷崇樹浩以抗擬桓溫溫深以不平浩又引接荒人謀立功於閩外嚴諫浩宜深思廉藺屈伸之道平勃相和之義庶令婉然

通志

卷一百一

列傳四十一

吳

和順人無閒言又觀頃日降附之徒皆人面獸心豈宜聚著都邑雜處人間適足以疑惑視聽耳浩深納之及哀帝踐阼議所承統時多異議嚴與丹陽尹庾劭議曰順本居正親親不可奪宜繼成皇帝諸儒咸以嚴議爲長竟從之隆和元年詔曰天文失度太史雖有禳祈之事猶覺肯屢彰今欲依鴻祀之制於太極前庭親執虔肅嚴諫曰鴻祀雖出尙書大傳先儒所不究歷代莫之興承天接神豈可以疑殆行事乎天道無親唯德是輔陛下祇順恭敬畱心兆庶可以消災復異皆已蹈而行之德合神明卽禱久矣豈須屈萬乘之尊修雜祀之事

君舉必書可不慎歟帝嘉之而止以爲揚州大中正嚴不就有司奏免詔特以侯領尚書時東海王奕求海鹽錢塘以水牛牽埭稅取錢直帝初從之嚴諫乃止初帝或施私恩以錢帛賜左右嚴又啓諸所別賜及給廚食皆應減省帝曰左右多困乏故有所賜今通斷之又廚膳宜有減徹思詳具聞嚴多所匡益太和中拜吳興太守加秩中二千石善於宰牧甚得人和餘杭婦人經年荒賣其子以活夫之兄子武康有兄弟二人妻各有孕弟遠行未反遇荒歲不能兩全棄其子而活弟子嚴竝褒薦之又甄賞才能之士論者美焉五年以疾去職卒

通志

卷一百一

列傳四十一

七

于家三子道民宣城內史靜民散騎侍郎福民太子洗馬皆爲孫恩所害嚴叔父羣字敬林有智局志尙不羈蘇峻入石頭時匡術有寵於峻賓從甚盛羣與從兄愉同行於橫塘遇之愉止與語而羣初不視術術怒欲刃之愉下車抱術曰吾弟發狂卿爲我宥之乃獲免後峻平王導保存術嘗因衆坐令術勸羣酒以釋橫塘之憾羣荅曰羣非孔子阨同匡人雖陽和布氣鷹化爲鳩至於識者猶憎其目導有媿色仕歷中丞性嗜酒導嘗戒之曰卿恆飲不見酒家覆甌布日月久靡爛邪荅曰公不見肉糟淹更堪久邪嘗與親友書云今年田得七百



石糝米不足了麴糞事其耽酒如此卒於官嗣子沈字德度有美名何充薦沈於王導曰文思通敏宜登宰門辟丞相司徒掾琅邪王文學竝不就從兄坦以裘遺之辭不受坦曰晏平仲儉祀其先人豚肩不掩豆猶狐裘數十年卿復何辭於是受而服之是時沈與魏顛虞球虞存謝奉竝爲四族之雋沈子厥位至吳興太守廷尉厥子琳之以草書擅名又爲吳興太守侍中

丁潭字世康會稽山陰人也祖固吳司徒父彌梁州刺史潭爲郡功曹察孝廉除郎中稍遷丞相西閭祭酒時元帝稱制使各陳時事損益潭上書深切治要及帝踐

通志

卷一百一

列傳四十一

吳

阼拜駙馬都尉奉朝請尙書祠部郎時琅邪王哀始受封帝欲引朝賢爲其國上卿將用潭以問中書令賀循循曰郎中令職望清重實宜審授潭清淳眞粹雅有隱正聖明所簡才實宜之望爲琅琊王郎中令會哀薨潭上疏求行終喪禮詔下博議朝廷竟從太常賀循議令潭除服心喪二年大興三年遷王導驃騎司馬轉中書郎出爲廣武將軍東陽太守以清潔見稱徵爲太子左衛率不拜成帝踐阼以爲散騎常侍侍中蘇峻作亂帝蒙塵於石頭唯潭及侍中鍾雅劉超等隨從不離帝側峻誅以功賜爵永安伯遷大尙書徙廷尉累遷左光祿

大夫領國子祭酒本國大中正加散騎常侍康帝卽位  
屢表乞骸骨詔以光祿大夫還第門施行馬祿秩一如  
舊制給傳詔二人賜錢二十萬牀帳褥席年八十卒贈  
侍中大夫如故諡曰簡王導嘗謂孔敬康有公才而無  
公望丁世康有公望而無公才子話位至散騎侍郎張  
茂者字偉康少單貧有志行爲鄉里所敬信初起義兵  
討賊陳斌一郡用全元帝辟爲掾屬官有老牛數十將  
賣之茂曰殺牛有禁買者不得輒屠齒力疲老又不任  
耕駕是以無用之物收百姓利也帝乃止遷太子右衛  
率出補吳國內史沈充之反也茂與三子竝遇害茂弟  
通志

登宿元

列傳四十一

兗

盜爲周札將軍充討札盜又死之贈茂太僕茂少時夢  
得大象以問占夢萬推推曰君當爲大郡而不善也問  
其故推曰象者大獸獸者守也故知當得大郡然象以  
齒焚爲人所害果如其言

陶回丹陽人也祖基吳交州刺史父抗太子中庶子回  
辟司空府中軍主簿竝不就大將軍王敦命爲參軍轉  
州別駕敦死司空王導引爲從事中郎遷司馬蘇峻之  
役回與孔坦言於導請早出兵守江口語在坦傳峻將  
至回復謂亮曰峻知石頭有重戍不敢直下必向小丹  
陽南道步來宜伏兵要之可一戰而禽亮不從峻果由

小丹陽經秣陵迷失道逢郡人執以爲鄉導時峻夜行甚無部分亮聞之深悔不從回等之言尋王師敗績回還本縣收合義軍得千餘人竝爲步軍與陶侃温嶠等并力攻峻又別破韓晃以功封康樂伯時大賊新平綱維地廢司徒王導以回有器幹擢補北軍中候俄轉中護軍久之遷征虜將軍吳興太守時人饑穀貴三吳尤甚詔欲聽相鬻賣以拯一時之急回上疏乞振乏不待報輒開倉及割府郡軍資數萬斛米以救之由是一境獲全既而下詔并敕會稽吳郡依回振恤二郡賴之在郡四年徵拜領軍將軍加散騎常侍征虜將軍如故回

通志

卷之三

列傳四十一

序

性雅正不憚疆禦丹陽尹桓景佞事王導甚爲導所昵回常慷慨謂景非正人不宜親狎會熒惑守南斗經旬導語回曰南斗揚州分而熒惑守之吾當遜位以馱此譴回答曰公以明德作相輔弼聖主當親忠貞遠邪佞而與桓景造膝熒惑何由退舍導深媿之咸和二年以疾辭職帝不許徙護軍將軍常侍領軍如故未拜卒年五十一諡曰威四子汪陋隱無忌汪嗣爵位至輔國將軍宣城內史陋冠軍將軍隱少府無忌光祿勳兄弟咸有幹用

謝尚字仁祖豫章太守鯤之子也幼有至性七歲喪兄

哀慟過禮親戚異之八歲神悟夙成鯁嘗攜之送客或曰此兒一坐之顏回也尙應聲答曰坐無尼父焉別顏回席賓莫不歎異年十餘歲遭父憂丹陽尹溫嶠弔之尙號咷極哀旣而收涕告訴舉止有異常童嶠甚奇之及長開率穎秀辯悟絕倫脫略細行不爲流俗之事好衣刺文綺諸父責之因而自改遂知名善音樂博綜衆藝司徒王導深器之比之王戎常呼爲小安豐辟爲掾襲父爵咸亭侯始到府通謁導以其有勝會謂曰聞君能作鸚鵡舞一坐傾想寧有此理不尙曰佳便著衣幘而舞導令坐者撫掌擊節尙俯仰有中傍若無人其率詣如此轉西曹屬時有遭亂與父母乖離議者或以進仕理王事婚姻繼百世於禮非嫌尙議曰典禮之興皆因循情理開通弘勝如運有屯夷要當斷之以大義夫無後之罪三千所不過今婚姻將以繼百世崇宗緒此固不可塞也然至於天屬生離之哀父子乖絕之痛痛之深者莫深於茲夫以一體之小患猶或忘思慮損聽察況於抱傷心之巨痛懷切怛之至戚方寸旣亂豈能綜理時務哉有心之人決不冒榮苟進冒榮苟進之疇必非所求之旨徒開偷薄之門而長流弊之路或有執志邱園守心不革者猶當崇其操業以弘風尙而況舍

通志

卷一百一

列傳四十一

五

艱履戚之人勉之以榮貴邪遷會稽王友入補給事黃門侍郎出爲建武將軍歷陽太守轉督江夏義陽隨三郡軍事江夏相將軍如故時安西將軍庾翼鎮武昌尙數詣翼諮謀軍事嘗與翼共射翼曰卿若破的當以鼓吹相賞尙應聲中之翼卽以其副鼓吹給之尙爲政清簡始到官郡府以布四十疋爲尙造烏布帳尙壞之以爲軍士襦袴建元二年詔以爲南中郎將餘官如故會庾永薨復以本號督豫州四郡領江州刺史俄而復轉西中郎將督揚州之六郡諸軍事豫州刺史鎮歷陽大司馬桓溫欲有事中原使尙率衆向壽春進號安西將

通志

卷一百一十五

列傳四十一

五

軍初苻健將張遇降尙尙不能緩懷之遇怒據許昌叛尙討之爲遇所敗收付廷尉時康獻皇后臨朝卽尙之甥也特令降號爲建威將軍初尙之行也使建武將軍濮陽太守戴施據枋頭會冉閔之子智與其大將蔣幹來附復遣行人劉猗詣尙請救施止猗求傳國璽猗歸以告幹幹謂尙已敗慮不能救已猶豫不許施遣參軍何融率壯士百人入鄴登三臺助成譎之曰今且可出璽付我凶寇在外道路梗澀亦未敢送璽當遣單使馳白天子聞璽已在吾許知卿等至誠必遣重軍相救并厚相餉幹乃出璽付融融齎璽馳還枋頭尙遣振武將

軍胡彬率騎三百迎靈致諸京師時苻健將楊平戍許昌尚遣兵襲破之徵授給事中賜輅車鼓吹戍石頭永和和中拜尚書僕射出爲都督江西南諸軍事前將軍豫州刺史給事中僕射如故鎮歷陽加都督豫州揚州之五郡軍事在任有政績上表求入朝因畱京師署僕射事尋進號鎮西將軍鎮壽陽尚於是採拾樂人并制石磬以備太樂江表有鐘石之樂自尚始也桓温北平洛陽上疏請尚爲都督司州諸軍事將鎮洛陽以疾病不行升平初又進都督豫冀幽并四州病篤徵拜衛將軍加散騎常侍未至卒於歷陽時年五十詔贈散騎常侍衛將軍開府儀同三司諡曰簡無子從弟奕以子康襲爵早卒康弟靜復以子肅嗣又無子靜子虔以子靈祐繼鯤後

通志

卷宿天

列傳四十一

五

謝安字安石尚從弟也父袁太常卿安年四歲時譙郡桓彝見而歎曰此兒風神秀徹後當不減王東海及總角神識沈敏風宇條暢善行書弱冠詣王濛清言良久既去濛子修日向客何如大人濛曰此客疊疊爲來逼人王導亦深器之由是少有重名初辟司徒府除佐著作郎竝以疾辭寓居會稽與王羲之及高陽許詢沙門支遁遊處出則漁弋山水入則言詠屬文無處世意揚

州刺史庾冰以安有重名必欲致之累下郡縣敦逼不得已赴召月餘告歸復除尚書郎琅邪王友竝不起吏部尚書范汪舉安爲吏部郎安以書距絕之有司奏安被召歷年不至禁錮終身遂栖遲東土常往臨安山中坐石室臨濬谷悠然歎曰此亦伯夷何遠嘗與孫綽等汎海風起浪湧諸人竝懼安吟嘯自若舟人以安爲悅猶去不止風轉急安徐曰如此將何歸邪舟人承言卽廻衆咸服其雅量雖放情邱壑然每遊賞必以妓女從旣累辟不就簡文帝時爲相曰安石旣與人同樂必不得人不與人同憂召之必至時安弟万爲西中郎將總藩

通志

卷宿天

列傳四十一

五

任之重安雖處衡門其名猶出万之右自然有公輔之望處家常以儀範訓子弟安妻劉惔妹也旣見家門富貴而安獨靜退乃謂曰丈夫不如此也安掩鼻曰恐不免耳及万黜廢安始有仕進志年已四十餘矣征西大將軍桓温請爲司馬將發新亭朝士咸送中丞高崧戲之曰卿屢違朝旨高臥東山諸人每相與言安石不肯出將如蒼生何蒼生今亦將如卿何安甚有媿色旣到温甚喜言生平歡笑竟日旣出温問左右曰頗嘗見我有如此客不温後詣安值其理髮安性遲緩久而方罷使取幘温見雷之曰令司馬著帽進其見重如此温當

北征會万病卒安投箋求歸尋除吳興太守在官無當時譽去後爲人所思頃之徵拜侍中遷吏部尙書中護軍簡文帝疾篤温上疏薦安宜受顧命及帝崩温入赴山陵止新亭大陳兵衛將移晉室呼安及王坦之欲於坐害之坦之甚懼問計於安安神色不變曰晉祚存亡在此一行旣見温坦之流汗沾衣倒執手版安從容就席坐定謂温曰安聞諸侯有道守在四鄰明公何須壁後置人邪温笑曰正自不能不爾耳遂笑語移日坦之與安初齊名至是方知坦之之劣温嘗以安所作簡文帝諡議以示坐賓曰此謝安石碎金也時孝武帝富於

通志

卷三十五

列傳四十一

五

春秋政不自己温威振内外人情噂暗互生同異安與坦之盡忠匡翼終能輯穆及温病篤諷朝廷加九錫使袁宏具草安見輒改之遂歷旬不就會温薨錫命遂寢尋爲尙書僕射領吏部加後將軍及中書令王坦之出爲徐州刺史詔安總關中書事安義存輔導雖會稽王道子亦賴弼諧之益時疆敵寇境邊書續至梁益不守樊鄧陷沒安每鎮以和靖御以長算德政旣行文武用命不存小察弘以大綱威懷外著人皆比之王導謂文雅過之嘗與王羲之登冶城悠然遐想有高世之志羲之謂曰夏禹勤王手足胼胝文王旰食日不暇給今四



郊多壘宜思自效而虛談廢務浮文妨要恐非當今所  
宜安曰秦任商鞅二世而亡豈清言致患邪是時宮室  
毀壞安欲繕之尙書令王彪之等以外寇爲諫安不從  
竟獨決之宮室用成皆仰模元象合體辰極而役無勞  
怨又領揚州刺史詔以甲仗百人入殿時帝始親萬機  
進安中書監驃騎將軍錄尙書事固讓軍號于時懸象  
失度亢旱彌年安奏興滅繼絕求晉初佐命功臣後而  
封之頃之加司徒後軍文武盡配大府又讓不拜復加  
侍中都督揚豫徐兗青五州幽州之燕國諸軍事假節  
時苻堅疆盛疆場多虞諸將敗退相繼安遣弟石及兄  
子元等應機征討所在剋捷拜衛將軍開府儀同三司  
封建昌縣公堅後率衆號百萬次于淮淝京師震恐加  
安征討大都督元入問計安夷然無懼色荅曰已別有  
旨旣而寂然元不敢復言乃令張元重請安遂命駕出  
山墅親朋畢集方與元圍碁賭別墅安常碁劣於元是  
日元懼便爲敵手而又不勝安顧謂其甥羊曇曰以墅  
乞汝安遂遊陟至夜乃還指授將帥各當其任元等旣  
破堅有驛書至安方對客圍碁看書旣竟便攝放牀上  
了無喜色碁如故客問之徐荅云小兒輩遂已破賊旣  
罷還內過戶限心喜甚不覺屐齒之折其矯情鎮物如

通志

卷一百一十五

列傳四十一

五

此以總統進拜太保安方欲混一文軌上疏求自北征  
乃進都督揚江荆司豫徐兗青冀幽并寧益雍梁十五  
州軍事加黃鉞其本官悉加故置從事中郎二人安上  
疏讓太保及爵不許是時桓冲既卒荆江二州竝缺物  
論以元勳望宜以授之安以父子皆著大勳恐為朝廷  
所疑又懼桓氏失職桓石虔復有沔陽之功慮其驍猛  
在形勝之地終或難制乃以桓石民為荊州改桓伊於  
中流石虔為豫州既以三桓據三州彼此無怨各得所  
任其經遠無競類皆如此性好音樂自弟万喪十年不  
聽音樂及登台輔期喪不廢樂王坦之以書喻之不從

通志

卷一百一

列傳四十一

五

衣冠效之遂以成俗又於土山營墅樓館林竹甚盛每  
攜中外子姪往來游集肴饌亦屢費百金世頗以此譏  
焉而安殊不以屑意常疑劉牢之既不可獨任王味之  
不宜專城既而牢之以亂終而味之亦以貪敗由是識  
者服其知人時會稽王道子專權而姦諂頗相扇構安  
出鎮廣陵之步邱築壘曰新城以避之帝出祖于西池  
獻觴賦詩焉安雖受朝寄然東山之志始末不愉每形  
於言色及鎮新城盡室而行造汎海之裝欲須經略粗  
定自江道還東雅志未就遂遇疾篤上疏請量宜旋旆  
并召子征虜將軍琰解甲息徒命龍驤將軍朱序進據

洛陽前鋒都督元抗威彭沛委以董督若二賊假延來  
年水生東西齊舉詔遣侍中慰勞遂還都聞當輿入西  
州門自以本志不遂深自慨失因悵然謂所親曰昔桓  
溫在時吾嘗懼不全忽夢乘溫輿行十六里見一白雞  
而止乘溫輿者代其位也十六里止今十六年矣白雞  
主酉今太歲在酉吾疾殆不起乎乃上疏遜位詔遣侍  
中尙書喻旨先是安發石頭金鼓忽破又語未嘗謬而  
忽一誤衆亦怪異之尋薨時年六十六帝三日臨于朝  
堂賜東園祕器朝服一具衣一襲錢百萬布千疋蠟五  
百斤贈太傅諡曰文靖以無下舍詔府中備凶儀及葬

通志

卷一百一十五

列傳四十一

五

加殊禮依大司馬桓溫故事又以平苻堅勳更封廬陵  
郡公安少有盛名時多愛慕鄉人有罷中宿縣者還詣  
安安問其歸資荅曰有蒲葵扇五萬安乃取其中者捉  
之京師士庶競市價增數倍安能爲洛下書生詠有鼻  
疾故其音濁名流愛其詠而弗能及或手掩鼻以斲之  
及至新城築埭於城北後人追思之名爲召伯埭羊曇  
者太山人知名士也爲安所愛重安薨後輟樂彌年行  
不由西州路嘗因石頭大醉扶路唱樂不覺至州門左  
右白曰此西州門曇悲感不已以馬策扣扉誦曹子建  
詩曰生存處華屋零落歸山邱因慟哭而去安有二子

瑤瑛瑤襲爵官至琅邪王友早卒子該嗣終東陽太守  
無子弟光祿勳模以子承伯嗣有罪國除劉裕以安勳  
德濟世特更封該弟澹爲柴桑侯邑千戶奉安祀澹少  
歷顯位桓元篡位以澹兼太尉與王謚俱齎冊到姑孰  
元熙中爲光祿大夫復兼太保持節奉冊禪宋瑛字瑗  
度弱冠以貞幹稱美風姿與從兄護軍淡雖比居不往  
來宗中子弟惟與才令者數人相接拜著作郎轉祕書  
丞累遷散騎常侍侍中持堅之役安以瑛有軍國才用  
出爲輔國將軍以精卒八千與從兄元俱陷陣破堅以  
勳封望蔡公尋遭父憂去官服闋除征虜將軍會稽內  
史頃之徵爲尚書右僕射領太子詹事加散騎常侍將  
軍如故又遭母喪朝廷疑其葬禮議者云潘岳爲賈充  
婦宜城宣君誄云昔在武侯喪禮殊倫伉儷一體朝儀  
則均謂宜資給葬禮悉依太傅故事先是王珣娶万女  
珣弟珉娶安女竝不終由是與謝氏有隙珣時爲僕射  
猶以前憾緩其事珣聞恥之遂自造輜輶車以葬議者  
譏之太元末爲護軍將軍加右將軍會稽王道子以爲  
司馬右將軍如故王恭舉兵假瑛節都督前鋒軍事恭  
平遷衛將軍徐州刺史假節孫恩作亂加督吳興義興  
二郡軍事討恩至義興斬賊許允之迎太守魏郡還郡

通志

卷一百一

列傳四十一

堯

進討吳興賊邱佗破之又詔琰與輔國將軍劉牢之俱討孫恩恩逃于海島朝廷憂之以琰爲會稽內史都督五郡軍事本官竝如故琰旣以資望鎮越土議者謂無復東顧之虞及至郡無綏撫之能而不爲武備將帥皆諫曰疆賊在海伺人形便宜振揚仁風開其自新之路琰曰持堅百萬尙送死淮南況孫恩奔軼歸海若其復至正是天不養國賊令速就戮耳遂不從其言恩後果復寇浹口入餘姚破上虞進及邢浦去山陰北三十五里琰遣參軍劉宣之距破恩旣而上黨太守張虔碩戰敗羣賊銳進人情震駭咸以宜持重嚴備且列水軍於

通志

卷一百一

列傳四十一

五

南湖分兵設伏以待之琰不聽賊旣至尙未食琰曰要當先滅此寇而後食耳跨馬而出廣武將軍桓寶爲前鋒摧鋒陷陣殺賊甚多而塘路迤狹琰軍魚貫而前賊於艦中傍射之前後斷絕琰至千秋亭敗績琰帳下都督張猛於後斫琰馬琰墮地與二子肇峻俱被害寶亦死之後劉裕左里之捷生擒猛送琰小子混混剗肝生食之詔以琰父子殞於君親忠孝萃於一門贈琰侍中司空諡曰忠肅三子肇峻混肇歷驃騎參軍峻以琰勳封建昌侯及沒於賊詔贈肇散騎常侍峻散騎侍郎混字叔源少有美譽善屬文初孝武帝爲晉陵公主求婚

謂王珣曰主婿但如劉眞長王子敬便足如王敦桓元子誠可才小富貴便預人家事珣對曰謝混雖不及眞長不減子敬帝曰如此便足未幾帝崩袁山松欲以女妻之珣曰卿莫近禁鬻初元帝始鎮建業公私窘罄每得一狔以爲珍膳項上一鬻尤美輒以薦帝羣下未嘗敢食于時呼爲禁鬻故珣因以爲戲混竟尙主襲父爵桓元嘗欲以安宅爲營混曰召伯之仁猶惠及甘棠文靖之德更不保五畝之宅邪元聞慙而止歷中書令中領軍尙書左僕射領選以黨劉毅誅國除及宋受禪謝晦謂劉裕曰陛下應天受命登壇日恨不得謝益壽奉

通志

卷宿天

列傳四十一

空

璽綬裕亦歎曰吾甚恨之使後生不得見其風流益壽混小字也安兄奕字無奕少有名譽初爲剡令有老人犯法奕以醇酒飲之醉猶未已安時年七八歲在奕膝邊諫止之奕爲改容遣之與桓温善温辟爲安西司馬猶推布衣好在温座岸幘笑詠無異常日桓温曰我方外司馬奕每因酒無復朝廷禮嘗逼温飲温走入南康主門避之主曰君若無任司馬我何由得相見奕遂攜酒就聽事引温一兵帥共飲曰失一老兵得一老兵亦何所在温不之責從兄尙有德政旣卒爲西藩所思朝議以奕立行有素必能嗣尙事乃遷都督豫司冀并四

州軍事安西將軍豫州刺史假節未幾卒官贈鎮西將軍三子泉靖元泉早有名譽歷義興太守靖官至太常元字幼度少穎悟與從兄朗俱爲叔父安所器重安常戒約子姪因曰子弟亦何豫人事而正欲使其佳諸人莫有言者元荅曰譬如芝蘭玉樹欲使其生於庭階耳安悅元少好佩紫羅香囊安患之而不欲傷其意因戲賭取卽焚之於此遂止及長有經國才略屢辟不起後與王珣俱被桓溫辟爲掾竝禮重之轉征西將軍桓豁司馬領南郡相監北征諸軍事于時苻堅彊盛邊境數被侵寇朝廷求文武良將可以鎮禦北方者安乃以元應舉郝超雖素與元不善聞而歎之曰安違衆舉親明也元必不負舉才也時咸以爲不然超曰吾嘗與元共在桓公府見其使才雖履屐閒亦得其任所以知之於是徵還拜建武將軍兗州刺史領廣陵相監江北諸軍事時苻堅遣軍圍襄陽車騎將軍桓沖禦之詔元發三州人丁遣彭城內史何謙游軍淮泗以爲形援襄陽旣沒堅將彭超攻龍驤將軍戴遂於彭城元率東莞太守高衡後軍將軍何謙次于泗口欲遣閒使報遂令知救至其道無由小將田泓請行乃沒水潛行將趣城爲賊所獲賊厚賂泓使云南軍已破泓僞許之旣而告城中

通志

卷一百一

列傳四十一

空

曰南軍垂至我單行來報爲賊所得勉之遂遇害時彭超置輜重於畱城元乃揚聲遣謙等向畱城超聞之還保輜重謙馳進解彭城圍超復進軍南侵堅將句難毛當自襄陽來會超圍幽州刺史田洛於三阿有衆六萬詔征虜將軍謝石率水軍次涂中右衛將軍毛安之游擊將軍河間王曇之淮南太守楊廣宣城內史邱準次堂邑旣而盱眙城陷高密內史毛藻沒安之等軍人相驚遂各散退朝廷震動元於是自廣陵西討難等何謙解田洛圍進據白馬與賊大戰破之斬其僞將都督顏因復進擊又破之斬其僞將邵保超難引退元率何謙

通志

卷宿天

列傳四十一

空

戴遂田洛追之戰于君川復大破之元參軍劉牢之攻破浮航及白船督護諸葛侃單父令李都又破其運艦難等相率北走僅以身免於是罷彭城下邳二戍詔遣殿中將軍慰勞進號冠軍加領徐州刺史還于廣陵以功封東興縣侯及苻堅自率兵次于項城衆號百萬而涼州之師始達成陽蜀漢順流幽并係至先遣苻融慕容暉張蚝苻方等至穎口梁成王先等屯洛澗詔以元爲前鋒都督徐兗青三州揚州之晉陵幽州之燕國諸軍事與叔父征虜將軍石從弟輔國將軍琰西中郎將桓伊龍驤將軍檀元建威將軍戴熙揚武將軍陶隱等



拒之衆凡八萬元先遣廣陵相劉牢之五千人直指洛澗卽斬梁成及成弟雲步騎崩潰爭赴淮水牢之縱兵追之生禽堅僞將梁他王顯梁悌慕容屈氏等收其軍實堅進屯壽陽列陣臨淝水元軍不得渡元使謂苻融曰君遠涉吾境而臨水爲陣是不欲速戰諸君稍却令將士得周旋僕與諸君緩轡而觀之不亦樂乎堅衆曰宜阻淝水莫令得上我衆彼寡勢必萬全堅曰但却軍令得過而我以鐵騎數十萬向水逼而殺之融亦以爲然遂麾使却陣衆因亂不能止於是元與琰伊等以精銳八千涉渡淝水石軍距張蚝小退元琰仍進決戰淝

通志

卷一百一十五

列傳四十一

苻

水南堅中流矢臨陣斬融堅衆奔潰自相蹈藉投水死者不可勝計淝水爲之不流餘衆棄甲宵遯聞風聲鶴唳皆以爲王師已至草行露宿重以飢凍死者十七八獲堅乘輿雲母車儀服器械軍資珍寶山積牛馬驢羸駱駝十萬餘詔遣殿中將軍慰勞進號前將軍假節因讓不受賜錢百萬緡千匹旣而安奏苻堅喪敗宜乘其釁會以元爲前鋒都督率冠軍將軍桓石虔徑造渦潁經略舊都元復率衆次于彭城遣參軍劉襲攻堅兗州刺史張崇於鄆城走之使劉牢之守鄆城兗州旣平元患水道險阻糧運艱難用督護聞人萑謀堰呂梁水樹

柵立七埭爲派擁二岸之流以利運漕自此公私利便  
又進伐青州故謂之青州派遣淮陵太守高素以三千  
人向廣固降堅青州刺史苻朗又進伐冀州遣龍驤將  
軍劉牢之濟北太守丁匡據碭礪濟陽太守郭滿據滑  
臺奮武將軍顏雄渡河立營堅子丕遣將桑據屯黎陽  
元命劉襲夜襲據走之丕惶遽欲降元許之丕告饑元  
饋丕米二千斛又遣晉陵太守滕恬之渡河守黎陽三  
魏皆降以兗青司豫平加元都督徐兗青司冀幽并七  
州軍事元上疏以方平河北幽冀宜須總督司州懸遠  
應統豫州以勳封康樂縣公元請以先封東興侯賜兄  
子玩詔聽之更封玩豫寧伯復遣寧遠將軍吞演伐申  
凱於魏郡破之元欲令豫州刺史朱序鎮梁國元住彭  
城北固河上西援洛陽內藩朝廷朝議以征役旣久宜  
置戍而還使元還鎮淮陰序鎮壽陽會翟遼據黎陽反  
執滕恬之又泰山太守張願舉郡叛河北騷動元自以  
處分失所上疏送節盡求解所職詔慰勞令且還鎮淮  
陰以朱序代鎮彭城元旣還遇疾上疏解職詔書不許  
元又自陳旣不堪攝職慮有曠廢詔又使移鎮東陽城  
元卽路於道疾篤上疏遣長史劉濟奉送節蓋章傳詔  
遣高手醫一人令自消息又使還京口療疾元奉詔便

還疾久不差又上疏讓職寢不報前後表疏十餘上久之乃轉授散騎常侍左將軍會稽內史時吳興太守晉寧侯張元之亦以才學顯自吏部尚書與元同年之郡而元之名亞於元時人稱爲南北二元論者美之元旣與疾之郡十三年卒於官時年四十六追贈車騎將軍開府儀同三司諡曰獻武子瑀嗣祕書郎早卒子靈運嗣瑀少不惠而靈運文藻豔逸元常稱曰我尙生瑀瑀那得不生靈運永熙中爲劉裕世子左衛率始從元征伐者何謙字恭子東海人戴遂字安邱處士達之弟竝驍果多權略達厲操東山而遂以武勇顯謝安嘗謂遂曰卿兄弟志業何殊遂曰下官不堪其憂家兄不改其樂遂以軍功封廣信侯位至大司農万字万石才器雋秀雖器量不及安而善自衒曜故早有時譽工言論善屬文敘漁父屈原季主賈誼楚老龔勝孫登嵇康四隱四顯爲八賢論其旨以處者爲優出者爲劣以示孫綽綽與往反以體公識遠者則出處同歸嘗與蔡系送客于征虜亭與系爭言系推万落牀冠帽傾脫万徐拂衣就席神意自若坐定謂系曰卿幾壞我面系曰本不爲卿面計然俱不以介意時亦以此稱之弱冠辟司徒掾遷右西屬不就簡文帝作相聞其名召爲撫軍從事中

通志

卷一百一

列傳四十一

宋

郎方着白綸巾鶴氅裘履版而前既見與帝共談移日  
太原王述方之妻父也爲揚州刺史方嘗衣白綸巾乘  
平肩輿徑至聽事前謂述曰人言君侯癡君侯信自癡  
述曰非無此論但晚合耳方再遷豫州刺史領淮南太  
守監司豫冀并四州軍事假節王羲之與桓溫箋曰謝  
方才流經通處廊廟參諷議故是後來一器而今屈其  
邁往之氣以俯順荒餘近是違才易務矣溫不從方既  
受任北征矜豪傲物常以嘯詠自高未嘗撫衆兄安深  
憂之自隊主將帥已下安無不慰勉謂方曰汝爲元帥  
諸將宜數接對以悅其心豈有傲誕若斯而能濟事也

通志

卷一百一

列傳四十一

空

方乃召集諸將都無所說直以如意指四座云諸將皆  
勁卒諸將益恨之既而先遣征虜將軍劉建脩治馬頭  
城池自率衆入渦潁以援洛陽北中郎將郗曇以疾病  
退還彭城方以爲賊盛致退便引軍還衆遂潰散狼狽  
單歸廢爲庶人後復以爲散騎常侍會卒時年四十二  
因以爲贈子韶字穆度少有名時謝氏尤彥秀者稱封  
胡羯末封謂韶胡謂朗羯謂元末謂川皆其小字也韶  
朗川竝早卒唯元以功名終韶至車騎司馬韶子恩字  
景伯宏達有遠韻爲黃門郎武昌太守恩三子曜弘微  
皆歷顯位朗字長度父據早卒朗善言元理文義豔發

名亞於元總角時病新起體甚羸未堪勞於叔父安前  
與沙門支遜講論遂至相苦其母王氏再遣信令還安  
欲留使竟論王氏因出云新婦少遭艱難一生所寄惟  
在此兒遂流涕攜朗去安謂坐客曰家嫂辭情慷慨恨  
不使朝士見之朗終於東陽太守子重字景重明秀有  
才名爲會稽王道子驃騎長史嘗因侍坐于時月夜明  
淨道子歎以爲佳重率爾曰意謂乃不如微雲點綴道  
子因戲重曰卿居心不淨乃復欲滓穢太清邪子絢字  
宣映曾於公座戲調無禮於其舅袁湛湛甚不堪之謂  
曰汝父昔已輕舅今汝復來加我可謂世無渭陽情也

通志

卷宿天

列傳四十一

突

絢父重卽王胡之外孫與舅亦有不協之論湛故有此  
及云万弟石字石奴初拜祕書郎累遷尙書僕射征句  
難以勳封興平縣伯淮淝之役詔石解僕射以將軍假  
節征討大都督與兄子元琰破持堅先是童謠云誰謂  
爾堅石打碎故桓豁皆以石名子以邀功焉堅之敗也  
雖功始牢之而成于元琰然石時實爲都督焉遷中軍  
將軍尙書令更封南康郡公于時學校陵遲石上疏請  
興復國學以訓胄子班下州郡普脩鄉校疏奏孝武帝  
納焉兄安薨石遷衛將軍加散騎常侍以公事與吏部  
郎王恭互相短長恭甚忿恨自陳褊阨不允且疾源深

固乞還私門石亦上疏遜位有司奏石輒去職免官詔曰石以疾求退豈準之常制其喻令還茂餘不起表十餘上帝不許石乞依故尙書令王彪之例於府綜攝詔聽之疾篤進位開府儀同三司加鼓吹未拜卒時年六十二石少患面創療之莫愈乃自匿夜有物來舐其瘡隨舐隨差舐處甚白故世呼爲謝白面石在職務存文刻旣無他才望直以宰相弟兼有大勳遂居清顯而聚斂無饜取譏當世追贈司空禮官議謚博士范弘之議謚曰襄墨公語在弘之傳朝議不從單謚曰襄子汪嗣早卒汪從兄沖以子明慧嗣爲孫恩所害明慧從兄喻復以子暲嗣宋受禪國除逸字茂度父鐵永嘉太守逸性剛硬無所屈撓頗有理識累遷侍中時孝武帝觴樂之後多賜臣文詔辭義有不雅者逸輒焚毀之其他侍臣被詔者或宣揚之故論者以此多逸後爲吳興太守孫恩之亂爲賊胡桀郗驪等所執害之賊逼令北面逸厲聲曰我不得罪天子何北面之有遂害之逸妻郗氏甚妒逸先娶妾郗氏怨懟與逸書告絕逸以其書非婦人詞疑其門下生仇元達爲之作遂斥元達元達怒遂投孫恩并害逸兄弟竟至滅門

